



kat.komp.

53885

53886

I

Mag. St. Dr.



53885-53886

*Filoxenia 125/a.b*

*VIII. m. 11. a. b.*

JOACHIMI DE HIRTENBERG

PASTORII.

# CHARACTER VIRTUTUM

variis, aliorum etiam  
quà veterum, quà recentium  
Autorum coloribus ad-  
umbratus.

Editio quarta & à mendis prio-  
ribus repurgata.

Adjunctum est aliud opusculum, Lu-  
cem Virtutum ex naturâ stellarum explicans,  
Præluſtribus GULDENSTERNIIS  
olim ſimul cum Charactere  
dedicatum.



---

DANTISCI,

Imprim. DAV-FRIDERICUS RHETIUS.



*Illustrissimo & Reverendissimo*

DOMINO

Dn. JOANNI SBASKI,

Episcopo Przemisliensi, Abbati  
Suleovienfi,

DOMINO & PATRONO

53885, GRATIOSISSIMO.

**O**ffero Tibi, *Illustrissime Patrone*, opus mole perexigu-  
uum, prolixo offerentis affectu magnum, argu-  
menti præstantiâ maximum, De Virtute enim agit,  
cujus naturam & officia, ab aliis fusè descripta, novo  
compendio, novis coloribus depingit: perinde ut Ingen-  
tia terrarum spatia exili nonnunquam tabulâ comprehen-  
di solent, magno lectoris allevamento, memoriæ sub-  
sidio, minori chartarum pondere, rerum non minori.  
Quod si autem viros Excellentes etiam in imagine suspi-  
cere ac venerari fas est: quanto magis Virtutem, cui om-  
nis excellentiæ in his terris origo & honos debetur,  
Illa ex immortalitatis sinu profecta, exercitatione aucta,  
hominem supra omnia humana, supra ipsam etiam fortune  
& fativim evehere, naturisque immortalibus reddere  
parem potest. Illa nativâ suâ pulchritudine adeo est exi-  
mia, adeò opibus propriis dives, ut sine dote etiam & vel  
nuda placere sui intelligentibus & capacibus soleat. In  
eâ præcipuè *magnum* illud *pulchrum* continetur, quod ve-  
teribus Sapientiæ magistris identidem in ore fuit, & in  
Scriptis eorum usque lucet. *Pulchri* illius lineamenta,  
& ichnographiam quandam ego junior olim, in gratiam  
Regii Sanguinis juvenum *Castellani* dum *Gedanensium*, co-  
gnatorum Tuorum, dare conatus sum. Verum illi fato  
præpropere, & antequam virtutem totam capere, ac mo-  
ribus exprimere possent, subrepti, ipsam etiam familiæ no-  
men

men secum terris his nostris abstulere. Opusculum verò hoc variis postea in locis, formâ non unâ recusum, cum applausu omnium receptum, alicubi etiam mendis aspersum fuit non paucis. Sub limam igitur id revocare, alicubi & augere, tandem verò sic renovatum novo Patrono, ejusdem tamen prosapiæ, cujus illustre illud juvenum defunctorum par erat, inscribere visum fuit. Tibi nimirum Illustrissime Domine, qui vivum omnium Virtutum exemplar & character es, & de me ac domo meâ præclare mereri nunquam cessas. Quibus beneficiis uti luculenter ornari, ita simul anxium me reddi jam dudum sentio, dum assiduò modos vestigo, quibus gratum erga Te animum in publico eruditi orbis theatro faciam testatum. Id verò sine morâ facere ardens, hunc ipsum, qui ex proximo occurrit, arripio tractatum, non animo solvendi debitum, sed profitendi tantum, quod debeam. In futurum verò, si vitam producere licebit, aliam grati animi testificationem polliceor, quæ & Dignitati sacri Muneris Tui aliquanto melius respondeat, & magnis tum Virtutibus, tum meritis Tuis spectabilius rependat præconium. Vale, Illustrissime Antistes, & diu flore in decus Ecclesiæ, emolumentum Reipublice nostrum solatium. Dab. Ged. III. Nov. Anno 1679

Illustriss. Dominationis Vestræ

*observantissimus Servus*

JOACHIMUS PASTORIUS,

Can. Ch. Dec. & Official Ged. ac per  
Pomeraniam generalis &c. &c.

**U**T Momi dentem ab hoc opusculo tanto longius amoveam, lubet pro amuleto amicorum judicia subjungere; quamquam forsan ad lucem eorum foetus hic haud facile magis exsplendescet, quam Autor erubuit. Primas ducat brevis Epistola à magnæ dignationis & claritatis, etiam inter literatos, Viro profecta, quam eo, quo ad me nuperrime scripta est, idiomate apponam.

*Monsieur & treshonoré Amy.*

**J**E vous renvoye la premiere feuille de vos Caracteres & vous dis en verité, que je l' ay leue non seulement avec plaisir, mais aussi avec admiration. Vous faites tousiours bien, mais en cecy vous vous estes sur passé vous mesme, & comme vostre esprit est excellent en tous vos autres escrits, en cestvyci il est prèsque divin. Je vous prie donc de me faire la faveur, que je pvisse avoir bien tost le reste. La dedication est aussi fort belle, & je suis

Monsieur

*V. treshumbl. serv.*

Vincent. Fabricius,  
Synd. Ged.


# AD LECTOREM.

**C**ERNE CHARACTERM, spirantes undique vultus  
Adspice, quos VIRTUS incluta, LECTOR, habet:  
Dextera Phidiaco dedit hos PASTORIA cælo,  
Sarmatici tatrix nobilis illa Pepli.  
Digna fuit sculpi, rerum pulcherrima, VIRTUS:  
Et fuit Hac illam sculpere digna MANUS.

f.

Joh. Petr. Titius.






# CHARACTER VIRTUTUM.

PROOEMIUM.

De Fragilitate Humanâ.

uisquis *Homo* es, ex *humo* ortum dictumque te cogita. Nomine tuo originis tuæ admoneris, ne exitus tui obliviscaris. De Terrâ, infimo & ad pedes vilissimorum animalium abjecto elemento compositus es. Matrem tuam teris, & vix aspicere eam unquam, nisi despiciens, potes. Limus adeò es facile diffluens, pulvis levi aurâ diffabilis, verè imbecillitatis exemplum, verè spoliū temporis, verè ludus fortunæ, mancipium laborum, miseriarum gymnasium, præda denique Mortis. A fletu vitam ordiris, & velut invitus lucem suscipis. Pueritiam inter flagra, robur ætatis inter dura operum exigis, pariter asperis rebus, ne succumbas, quàm secundis, ne corrumparis, malè securus. Nunc spei, nunc metûs, nunc iræ, nunc amoris ludibrium: quoquò te vertis, modestiæ stimulos & flagella superbiæ reperiens: 'Omni te corporis, fortunæque tuæ machinâ monente, ut *humo* natus, *humiliter* de te

A

senti-

sentias, animo tamen supra *humum* & humana omnia exurgas. Ne in caducis æternitatem, ne in miseriis beatitudinem quærens, inde in fastum laxeris, unde in gyrum modestiæ adduci debebas; aut fucatis fidas, incubesve bonis, verorum incuriosus vel contemptor.

## De hominis statu meliorem ex studio Virtutis.

**N**on totus ex *humo* homo es, non totus luteus & fragilis. Ille, qui de terrâ tibi corpus, animum de cœlo dedit DEUS, substantiam sydereis mentibus cognatam, auræ divinæ particulam, inquilinam corporis, vitæ totius Ducem atque Imperatricem, mori nesciam, ad æterna & æternum beata tendentem; tantoq; acrius tendentem, quando luce cœlesti, à fumis corporeæ defæcatur imbecillitatis; cum ea per se alioquin ferè debilior sit, quàm ut per tot obices eluctari possit; corpore ad sua, inpræsens grata, olim nocitura, fortiter rapiente. Interim contrahit illa, & sæpe quidem impare, semper tamen aliquo impetu repugnat; eo victoriosior, quò plus à DEO, ab institutione & exercitio accepit opis. Et cum à robustâ, frænumq; nondum passâ voluptatum cupiditate vinci nesciit, *Continentiæ*; cum contumaci dolore, post multam luctam invicta stetit, *Tolerantiæ* laude donatur; cum quemvis denique affectum facile, & quasi solens vincit, perfectæ *Virtutis*



## VIRTUTUM.

3

*tutis* coronam accipit. Virtutis, proprii maximè mortalium boni, & quod unum immortales facit; boni, omnia, quæ in terris extra ipsam splendent, vel habentis ut Instrumenta, vel ut vana aspernantis, lætis tristibusq; invictæ, & certam à pugnâ Laurum, vitamq; à morte ipsâ fumentis.

## De Causis & Adminiculis Virtutis.

**U**T ad tantum decus pervenias, DEo propitio inprimis opus est. Qui & nascenti melioris indolis igniculos, & progredienti adjumenta varia dare potest. Ab hoc Spiritum omnis boni autorem, ab hoc Magistros accipies, honesti inhonestique monstratores, qui bonum immortalitatis, qui pulchritudinem virtutis; etiam inimicis suis venerabilem, qui conscientia rectæ gaudia, malæ tormenta, & furiales faces ostendant: qui rimas vitiis, vitiosis convictum præcludere, & illecebras omnes calcare posse, qui otium, bonæ mentis sepulchrum, vitiorum verò nutriculum fugere doceant. Quibus autpribus Virtutis candidatus, dura à se exigere; vitiorumque etiam umbras averfari; & ut ab illicitis eò remotior sit, ne licita quidem omnia sibi permittere; sectari autem, & facere tandem bonos; clara porrò exempla, præcipuè DEUM testem omnium intueri; aliorum rectè factis impensè delectari, pravis ex animo irasci, aut indolescere, admonitionum, famæ, maximè verò conscientia, re-

## CHARACTER

verentem esse, facile primùm erubescendo, rubori in futurum causas præripere, examinare facta sua, mala confiteri, quotidie in melius proficere discat; donec colorem honesti ita penitus imbibat, ut elui non possit: & exercitatione crebrâ Virtus in consuetudinem & quasi Naturam vertat.

## De Objecto Virtutis.

**Q**uærenti, circa quid Virtus versetur, respondet Sapientia, circa Teipsum, circa animi Tui mortuus, & quæ ex his proficiuntur, actiones. Gerit quisque in se affectus, velut gladios, prodesse & obesse, prout reguntur, aptos: Ceu ventos, qui navim vitæ vehunt, & nisi clavum rectè teneas, mergunt. Ut benè vehant, aliquando dirigendi tantum, quò debent, aliquando ad mediocritatem revocandi sunt. Ira in vitium nimia esse vix potest, in homines inardescens, ratione temperari debet. Amor cum in DEUM fertur, haud facile modum excedet, cum in voluptates, opus habet fræno. Fidentem & intrepidum esse ad pericula, generosum habetur: tamen nec semper hæc, nec quævis adeunda. Rubor, virtutis color & custos est, sed & hunc tamen intra modum oportet consistere. Absque hoc pudendus pudor, atque index potiùs Rusticitatis, & mora bonarum actionum erit. Miseriâ alterius affici fas est, sed ita ne in publicum sis im-  
mise-

## VIRTUTUM.

5

misericors. Ægris oculis alienam felicitatem solet aspicere Æmulatio, solet & Invidia. Hæc non sibi deesse, sed alteri adesse bonum dolet, pessima sui carnifex. Illa non alteri adesse, sed sibi deesse bonum malè fert, sæpè stimulus Virtutis. Circa hos, similesvè affectus, occupat se Virtus, eos regere, vel temperare, vel extingvere quærens. Sed hos homini insitos quasi ignes excitat porro, alitque materies externa. Non opes tantum & honores, sed quicquid cœlo terræve appeti, aut fugi dignum est, ut virtus adeò non aliis finibus, quàm quibus Mundus, circumscribi possit.

## De Prudentia.

**V**irtus, non tantùm ea, quæ agimus aut dicimus, dirigit perficite; in intimam mentem se insinuat, & ipsam istam hominis gubernatricem gubernat, DEO ab industriâ humanâ poscente, ut quod ipsi proximum mortalis habet, quàm diligentissimè excolat consummetve. Primas & necessarias maximè in eo opere partes exercet Prudentia. Non illa solis contemplationibus se deterit, ut aliæ intellectûs magistræ; sed & has, & quicquid usquam obvenit, ad usum vitæ accommodat. Virtutum verè princeps, & cæteris planè id, quod oculis corpori, quod navi clavus. Hæc & vitæ cursum hominibus, & affectibus modum, & decòrum actionibus præscribit. Planè ars vivendi, bonorum

A 3

malorum



malorumque discriminatrix, rerum divinarum humanarumque sciens: Veri necesarii perspicax, errorum glaucomata facilè internoscens: Falli non opportuna, fraudes dolosque mortalium nec nesciens, nec usurpans: Præterita recordando, futura prævidendo, præsentia rectè ordinans. Consilia & aptè invenire, & scitè tegere, & benè exequi sagax. Non præceps in decidendo, sed nec tempora agendi cunctatione amittens. Cauta cum securitate potius, quàm felicia ex casu eligens. Virium tam suarum, quàm alienarum justa æstimatrix: apta adeò sibi, apta aliis demandare pensa sciens: Nec nulli, nec omnibus, sed perspectissimis ferè tantùm fidens. Minimùm Fortunæ credula, & ejus ictus prævidere atque exire gnara: Tempori, & foro serviens, quantum honestate integrâ licet. Ejus etiam memor, cum obliquo cursu contendit, quò recto non potest: Et cum inter contumaciæ abruptum, & deformæ obsequium, media incedit.

## De Pietate.

**A** Prudentiâ ad Pietatem imus, quæ & jure præcedere debuit, cum ea initium sapientiæ jure appelletur. A DEO quippe ut omnia bona oriuntur, ita ordiri nos omnia decet. Eò respicere mens nostra, ut ad principium, ut ad finem suum debet. Illum reverenter rimari, ac magis mirari, in magno primùm Naturæ libro oportet, ubi pulcher-

cherrimus rerum ordo artificem rectricemque maximum monstrat: nec fortè, aut ex se coaluisse docet, quæ in tantâ discordiâ constant sibi. Sed tacitum magis hoc docendi genus est, quàm ut ab omnibus intelligatur. Quare loqui insuper mortalibus, atque etiam insinuare se Divinitas voluit, per Prophetas, divino Spiritu afflatus, voluntatem aperiens, tandem & per Filium Unigenam, cui quisquis verè adhæsit, Filius DEI & Candidatus sit æternitatis. Sed Fide opus est, quâ, quidquid Christus promisit, docuit, credas firmiter, quicquid promeruit, amplectaris & in usum tuum vertas: Spe opus est, quâ gratiæ Divinæ, & Christi meritis innixus adversa & extrema omnia vincas, fiduciâ futuræ felicitatis. Caritate opus est, ut Optimum Maximumque Numen, super omnia adames, summæ ejus Majestatis non scrutator audax, sed devotus venerator. Ejus Gratiam, Christo duce, & sequestro, ambias omni caritatis obsequio, ejus gloriâ nihil habeas carius. Ei quicquid in te, vel circa te est, ei universum genus hominum cupias esse vestigale.

## De Probitate.

**E**X Pietate probitas sponte sua fluit, ab eâ aut nullo, aut exiguo limite distincta. Ubi enim iratum DEUM pertimescere, ubi beneficium sincerè amare cæperis, fieri vix potest, quin caveas offendere, quem revereare, quem diligas; aut si in-

firmitate, præcipitantiâve offenderis, quin misericordiam invoces. Post lapsus cautior, & adversum peccati insidias diligentius excubans: Tibi ipsi benè cupiens quidem, at haudquaquam fidens, multò minùs blandiens. Tùm verè triumphans, cum Te ipsum rectè amare, regere, vincere potuisti: Inde aliis amandis, regendis, vincendis, verè demum idoneus. Prono semper animo facturus aliis, qvòd Tibi ab aliis fieri velis, & æquè læsurus neminem, quàm lædi ab aliis nolis: Veniam verò dare peccantibus aliis facilius, quàm Tibi. Porro ore nunquam, quàm animo melior, nec famæ magis, quàm conscientiæ studens, & ubi homines fallere possis, testem tamen DEUM, & te ipsum timens. Nihil caducum tanti faciens, ut peccando redemptum cupias; nec vitam æstimans, quam per dedecus, & irato vitæ autore atque imperatore trahas. Multò magis & reddere vitam illi implacato horrens, qui, ubi vitam repoposcerit, vitæ porro rationes postulaturus est.

## De Temperantiâ.

**P**Robitatis spatiosa Arbor est; in multos se ramos diffundit. Quorum primus *Temperantia* est, circa vulgatas illecebras occupata Virtus; periculosas, quia ex parte necessarias: turpes sapè, quia ad belluarum ducunt confinium. Coeterùm duplex illa est, & prout materies variat, exinde nomen



men mutat. Cum alimentorum usum moderatur, *Sobrietas*; cum Veneris, *Castitas* vocatur. Illa vitium homini præscribit, non corpori, non animo, non fortunæ ipsius gravem; fami sitique, non gulæ superbientis fastidio consulentem, robori ad labores tuendo recreandoque, non ventris saginæ servientem. Necessitati scil. quantum satis, honestæ voluptati exiguum quid, nihil dare docens Luxuriæ; bonas horas, & instrumenta virtutum, exta ipsas consumere timens; hominem sibi voraginem, gurgitemve, in quo sua & semet absorbeat, fieri prohibens. Inprimis *Ebrietas* inimica, magnæ vitiorum aliorum nutrice; periculosas mentis Eclipses, & noxia in corpore interregna invehenti; insidiosæ porro illecebræ, & sub Hilaritatis, Humanitatisque vultu arrepti; cùm tristes rixas, morbosque ducat, imò ex hominibus reddat belluas. Soror Sobrietatis CASTITAS est, Veneris illicitæ frænum, oculos, aures, manus, totum denique corpus & animum à vetitis voluptatibus abstinens; naturæ verò stimulos legitimi cancellis matrimonii includens; nonnunquam & ita edomans, ut perpetuæ Virginitatis Laurum assequatur, Laurum non in quovis solo, nec ferè nisi Heroicâ victoriâ inveniendam, tamen duce gratiâ divinâ non rarò inventam Christianis, quibus nihil insuperabile esse voluit Cælum,

## De Sedulitate.

**L**aboris Otiique necessaria vitæ mortalium Vicissitudo est, quorum illo, nisi moderatus sit, atterimur, hoc mucescimus, quasi situ contracto. Inter utrumque tenet medium SEDULITAS, laboris nimii non amans, capitalis hostis inertiae, vera aliarum Virtutum obstetrix, verè pretium omnis felicitatis: quippe illo vendit omnia mortalibus cœlum, quos nimiâ facilitate corrumpere timet. Quos & sui esse æmulos cupit, jugiter ipsum instare operi suo solitum. Ulti autem virtus hæc actiosa semper, somni parca, avara temporis, larga sui est; ita aggredi cavet vana & quæ viribus, speive parùm responsura putet. Tam casum effectum laborem nolens, quàm effectum labore indignum. Adhæc sua & certa agit, spartæ, quam nacta est, ornandæ intenta: de aliis vel alienis parùm sollicita, nisi Caritas opem postulet, aut excuset curam. Rectè autem cæptis constanter insistit, laborem solans metæ intuitu. Omnia denique tempestivè & cum modo agit, ne sub onere fatiscat; æqua sui exactrix, & Ignaviæ, foedissimo malo, sic inimica, ut non sit sibi.

De Magnanimitate &  
Modestia.

**V**irtutis in terris splendidissima merces Honor est, sed à bonis & honoratis profectus. Res à  
DEO

DEO ipso tanti habita, ut ab hominibus inter primas hanc poscat. Et degener est, siue desertor, qui honorem bonis artibus non quaerit mereri: nec à contentu vindicare se studet; quem meretur, qui quà potest dignè, non fugit. Et ipsam profectò virtutem contemnit, qui hanc Virtutis Lauream contemnit. Cœterùm bonus animus, ut ab honore calcar petere amat, ita circa eum habenis eget. Quas MAGNANIMITAS adhibet, magnorum moderatrix honorum, ut minorum Modestia. Utraque de se rectis hominum bonorum judiciis gaudere docet, non insolescere; inque veris bonis, vera fastigia, viâ rectâ sectari, vana omnia aspernari, respuere indigna: laudes nec deprecari suas, nec pruriente acceptare aure, minimè autem exigere: DEUM, præclare factorum Ducem, se ministrum credere, non magis acta, quàm agenda contemplari; non præesse potius, quàm prodesse conari, neminem unquam, minimè verò suspicientes, despicere. Ut honorari mereatur, ardua prudenter, intrepideque aggredi solet, opes nec spernere, nec amare, sed pulchrè impendere: non invidere, non temerè, potiùs tamen, irasci, quàm odisse, gratiam verò & offensam in aperto gerere; nihil vile loqui vel agere, comem esse erga omnes, sed gravitate incorruptâ; calumnias parùm morari, & benè factis potius, quàm verborum certamine refellere: Ignominiâ, ut virtutis injuriâ, affici, sic tamen, ut Conscientiæ hilaritate se solatur.



tur. Denique rebus omnibus, secundis, adversis, æquis, iniquis, majorem se ostendere.

## De Fortitudine & Constantiâ.

**M**Ortem, horribile per se malum, timere Natura, meditari Sapiëntia, non recusare Fortitudo docet. Exinde cætera mala, dolores, pericula, ut morte minora, facile perferuntur; sed ea provocare, & temerè aggredi Audaces solent, nimii sui contemptores, prostituere robur animi, non impendere gnari, aliis rarò fructuosi, in se crudeles. Verè *Fortes* obsequi cordatè, non levi impetu occurrere amant Fato, probant pericula, sed causâ probatâ; ponunt, cum opus, Vitam, non projiciunt, non sanguine privari, sed malè fuso erubescere fugiunt. Viles sibi sunt, cum ostendere res jubet, quam cara sit ipsis Honestas. Extrema non reformidant, dum Justitiæ, dum gloriæ Divinæ velificantur. DEO, Parentibus, Patriæ cum se impendunt, reddere sibi videntur, quod accepere: cum caritatibus domesticis, tuendæ rei concreditæ insistere & immori se existimant: cum veritati, Religioni, & alienæ salutis spei; lætantur occasione vitæ tam pulchrè collocandæ. Quæ porrò alia vulgò timenda occurrunt, pro occasione, & campo virtutis habent. Fortunæ se oppositos rati, ut genuinum in ipsis frangat, paupertate, exilio, carcere invicti, & cum ad causam  
respe-

respexere, etiam gloriantes. Animo imperterriti, pleni fiducia, duris infracti, laborum tolerantes. Bello, grandi belluæ, non inhiantes, in illam delati, primum cum ipsâ pugnant, ut reddant innocentem. In ipsâ Re nihil nisi inhonesta reformidant, laboribus, vulneribus, & ubi res exigit, nobili se offerentes letho: Vincere cum decore quærentes; cedere nescii, præterquam Juri, aut ineluctabili Necessitati. In victis æqui, & superatis omnibus, pulcherrimum cumulum adjicientes, Victoriæ fui.

## De Mansuetudine.

**Q**uod bilis corpori; id Virtuti, præcipuè Fortitudini, Ira est; noxiis expellendis destinatus Ignis, sed & ipse, ut maximè noxius, sapè restringendus. Telum anceps, & valida manû regendum: cum ex alto erupit fastigio, verum fulmen. Quando modum excedit, brevis Infania jure dicta; utpote clavum homini, quo se, & alios regit, excutens. In eâ cohibendâ Mansuetudo occupatur, cum in Imperantibus est, Clementia dicta. Bilis edomandæ capistrum, ne facilius, aut vehementius, quàm par est, efferatur. Innocentibus irasci prohibens, & nocentium non malum, sed emendationem jubens expetere, moram dans iræ, sed ut discutiatur aut mitigetur, non ut acescat in odium; non amans memoriam, quæ recondere offensas sci-

at,

sed oblivisci; injurias privatim non reponens, sed alienæ potius cognitioni subjiciens; ad veniam dandam non difficilis, memor quippe, non rarò & sibi veniâ opus esse; sua & publica damna, si fieri potest, sine ullius noxâ amoliri optans; cùm puniri malefacta necesse est, peccantis animum, & gravitatem peccati cum curâ introspeciens, contumacibus, & exemplo nocituris severa, aliis placabilior, poenam sæpè differens, & poenitentiam contenta, malum verò patientibus nunquam insultans, & neminem, etiam merentem, perire sinens, nisi quem perire, vel ipsius, vel publicæ rei inter sit.

### De Justitiâ Universali.

**J**ustitia splendidissimum sidus, & cum id toto orbe suo lucet, virtutum omnium compendium est. Venarenda Pacis & Felicitatis mater, Belli & noxæ omnis è vitâ expultrix, magna officiorum Magistra, societatis humanæ Regina, averrunca injuriarum. Quæ suum cuique reddere docens, Fortitudini non invitæ campum, in quo se exerceat, præripit; normæ legum attenta & obsequens, rei auctoritate non violandâ sanctæ. Sive eam DEUS, sive ectypus DEI Ratio, & hujus ductu vicaria DEI potestas scripsit. Cumque legum aliæ à Naturâ internis mentium; aliæ consilio externis inscriptæ sint Tabulis; aliæ toti generi humano communes; aliæ



aliæ statibus certis adaptatæ; aliæ denique publica jura, aliæ parentum in liberos, Herorum in servos aliaque ejusmodi officia complectantur; omnium illa observatrix est, & si vel alibi non extent, moribus suis impressas ostendit. Sponte faciens recta, & tramitis sui, non minùs quàm sydera sunt, tenax. Ubi verò Leges tacent, vel non quadrant casibus, ex Æquo & Bono rem moderatur. Non tam verba Legum ferro suo rigentia, sed mentem inspicens Legislatorum; qui rerum varietatem, ultra legum præscripta patentem, rectæ rationis & prudentis judicii sceptro subjectam voluere; sceptro beatissimo, nisi in manûs devenerit eorum, qui Justitiam artem faciunt.

## De Justitiâ Commutativâ & Distributiva.

**U**T natura homines arctiùs inter se vinciret, mutuæ opis fecit egentes. Ne tamen confunderet, res hominesque certis gradibus, & dignitatibus distinxit. Nec actiones hominum ita omisit, quin bonis voluptatem, malis dolorem destinaverit pedissequum. Indigentia mutua succurri per contractus; Meritis præmia & poenas contingere voluit. In illis regendis Justitia *Commutatrix*, in his *Distributrix* cernitur. Prior circa eumentium, vendentium, mutuantium, locantium, conducentium, negotia occupatur: & ut rectè,  
hoc

hoc est, de consensu contrahentium, & æqualitate integrâ fiant, *dirigit*: aut si inæqualiter, & parte alterâ invitâ, vel deceptâ facta sint, *corrigit*. Altera quæ DISTRIBUTRIX dicitur, meriti alieni candida æstimatrix est. Nihil indignis ex gratia addens, nihil ex odio detrectans dignis. Virtutes in paribus sine Invidiâ agnoscens, sine malignitate deprædicans. Honore seu beneficio superioribus cultum, obsequium, grata officia præstans. Dignitati cujusque ex merito assurgens, benefactorum minime immemor, minime dissimulans. Contra etiam, nec vitiis laudem, nec malè factis præmia largiens; publicis in primis: nam privatim injuriis sæpè non abnuît beneficium reponere. Verùm in vita civili factis mercedem exstare, interesse virtutis, & humani generis censet, & mercedem quidem ex dignitate, tum facinoris, tum facientis admetitur. Cæca adversum corruptentes, in discriminandis, quæ differunt, oculata.

## De Beneficentiâ & Liberalitate.

**A**liis sua reddere Justitia, dare nostra Beneficentia docet; eò pulchrior Virtus, quò liberior; & quæ necessitatem alienam, spontè suam facit. Pulcherrima, cum benefaciens, non gloriolam, aut lucellum, sed honestum, & DEUM respicit; cum alacris est, & beneficium accipere se putat,

putat, ubi dedit. Consilio operâve juvare æquè facilis, atque lumen de lumine suo alteri accendere, domum suam, mensam, & omnia denique usui merentium sinens patere. Oculata nihilominus, & beneficia non projiciens temeritate; sed regens judicio: dignisque adeò dans, & pro modo tum copiae suae, tum indigentiae alienae, egestati verò ita subveniens, ut & rogandi sæpè necessitatem, verecundiamve antevertat. Hilari vultu, manu citâ, sermone modesto duplicans gratiam. A beneficiis viscum removens, & data memoriae accipientis delegans, suâ sæpè sinens effluere: non exprobrans, nisi insigniter ingratis, & gratos perseverentiâ dandi reddens. Latè porrò cum excurrat Beneficentia, & nempe per omnes necessitatis humanæ sinûs, maximè tamen opes, & nummos tractat, & nomine mutato, *Liberalitas* dicitur: quæ potissimum largiri, sed ut sit, quod largiaris, parare etiam & custodire opes docet, cœlestem liberalitatem non respuens, sed gratâ manu ac mente acceptans, vi doloque, at non labore honesto fugiens ditescere, & rem quidem augere, sed sine anxietate suâ, sine querelâ, injuriâ, onere alieno studens; non petax, & in accipiendo religiosa, cuique obligetur, curiosè dispiciens. Parta verò non adamans, sed servans, ut vitæ, valetudini, & honestati necessaria, ut impedimenta, sine quibus nec Virtutum iter possit constare, ut ægritudini, ut senectuti tuæ & parentum, ut educationi liberorum, aliorumque egestati peroptata suffugia. Sed ani-

mum his addicere, & possessionum suarum mancipium fieri cavet; ita profusionis Charybdim fugiens, ne in Scyllam Avaritiæ incidat. Quarum illa in largiendis, hæc in quærendis, servandisque opibus superat modum. Illa fontes liberalitatis exhaurit, hæc claudit & corrumpit. Illa pauperes plerumque ex opulentis facit, hæc in mediis divitiis pauper est; utraque monstrum detestabile, sed illa opibus, hæc homini periculosior est.

## De Magnificentiâ.

**A**Dhuc nomen mutat Beneficentia, & ubi ex magnâ fortunâ eluxit, *Magnificentia* vocatur. Nobiles maximè decens Virtus, & quos supra sortem aliorum opes gentilitiæ provexêre. Divitias ita collocans, uti & splendeant, & splendorem concilient possidenti; in sumptibus faciendis, non necessitati tantùm, sed & honori indulgens: Nec tam amorem, quàm admirationem, nec necessitudines, sed clientelas parans. In res præcipuè sacras larga, & cœlum æternitatemque quasi obligare sibi laborans. In artes quoque sed generi humano insigniter salutares, fautoribus multùm gloriosas, benefica. Non huic illive pauperi, sed gregi pauperum, etiam futurorum, prospiciens. Moles struens publicas, & feræ posteritati fulsuras, profuturasque. Dignitatis ubique retinens, cultu apparatuque non captans superbo, non destruens tenui auctoritatem, sordibus vehementer



hementer inimica, sed nec ostentationi, nec luxui indulgens; instrumenta Virtutis, non per inania, aut futilia absumens, nec sumptus illicitos faciens, moris causâ, sed nec moris negligens, dum honesto is non repugnet.

## De Veracitate.

**M**Entis interpret Sermo est, humanæ societatis magnus conciliator turbatorve; res parabilis, & in promptu exstans, undè ad expensam ejus plerique nimis faciles; sed eadem irrevocabilis, tantoque adeò religiosius custodienda mortalibus, quibus rerum plerarumque ratio rectius constaret, si sermonis ratio constaret exactius. Eum duabus sub Clavibus Virtus haberi voluit, *Veracitatis* & *Taciturnitatis*; ex quibus Veracitas ita promit sermonem, ut mentis intimo sensui respondeat, nihil utique, cum verè suæ spontis est, affirmans promittensve, quod tueri non velit, aut desperet, servare se posse. Dictorum ita tenax, ut & injurata fidem plerumque inveniat, semper utique mereatur; non jurans nisi summâ necessitate, nec unquam mente injurâtâ. Si conscientiam aliorum effugere & fucum facere hominibus queat, conscientiam DEI & suam reformidans; sensus suos in fraudem alienam non obtegens, non implicans in ambiguum verba, candori addicta, & veri fiduciâ in periculum etiam non inglorium animosa, non sustinens mendacii;

nisi tale sit, quod DEUS ipse videatur probaturus: quale obstetricum Hebræarum, lingvam mendacio, nemini obfuturo, quàm manus infanti sanguine polluere malentium. Simulationis impensè fugiens, in dissimulando dans non nihil Prudentiæ; ne animum malè nudatum temerè alienæ objiciat libidini, ne veritatem etiam prostituat, nemini profuturam, nocituram nonnemini: ne præter rationem delicta sua vulget, ne præter summam necessitatem laudes suas prædicet; Sordentes ex ore proprio, nisi res omninò postulet, majori eas calumniæ putori opponere.

### De Taciturnitate.

**A**ltera Lingvæ clavis est TACITURNITAS, magna tranquillitatis humanæ custos; non jam falsa tantùm arcere, sed & vera rectè promere ac condere docens virtus; frænum sermonis; cujus nunquam prodigum, vix liberalem, plerumque tenacem esse expedit. Scutum Prudentiæ, adeò largum, ut stultitiæ etiam regendæ sufficiat. (Verulam.) Noctis quasi beneficium consiliis rectius coquendis celandisve præstans, etiam quietem vitæ, cui nihil infestius est oris impotentiâ. Ut verò hæc cor in lingvâ, ita TACITURNITAS lingvam in corde gestare jubet, nunquam ad loquendum præceps, minimè coram iis, quos magis deceat loqui. Loquens quidem, sed tempestivè, sed loco & audientibus

entibus accommodata. Loquens, sed ea, quæ non præstet tacere, tacens, sed cum non expedit loqui. Loquens, sed modicè, & verbis nec parcis nimis defraudans, nec multis obruens audientem; Secreta non scrutans curiosè, commissæ sanctè & fideliter servans: Eâ parte nunquam securiorem se credens, quàm cum credidit ferè nemini.

## De Comitæte & Humanitate.

**H**Ominem homini quæ conciliat, & gratum reddit Virtus, *Humanitas* vocatur, cœterarum virtutum verè cōndimentum, permulcendæ mortalitati aptissimum nectar: honesta amoris illecebra; mentis, prout intus composita est, index & quasi Hedera; ad populum maximè necessaria, alia mentis bona vili pendentem, nisi in illâ exsplendescant. Ea est, quæ honestis jucunda miscet, sermonibus factisque nostris velut Gratias addens comites; quantum integro DEI favore licet, hominum quorumvis studens favori; ut placeat fructuosius, nullum colorem, præter inhonestum, assumere renuens. Discrimen personarum observans, & cuiq; decentem cultum, potiùs tamen nimium, quàm parcum exhibens. Gravitatis retinens, sed ita temperatè, nè amorem deminuat. Virtutes aliorum commendans, ut merentibus honorem, & stimulum addat merituris. Intempestivè laudare fugiens, nè putidum crimen Assentationis incurrat. Meren-

tem reprehensura, mollia fandi tempora, & verba minimùm offensura captat. Castigationem, ut Medicinam, nonnisi necessariam afferens, & quam consequens saltem fructus commendet. Libertate in alios non utens, nisi quam Amor imperet, aut excusare possit: Contentionum non amans, sensuum suorum non pertinax, non sugillatrix alienorum. Partes loquendi non sibi soli sumens, non aliorum interpellans sermones. Non maledica, & ut nihil cuiquam affingens adulando, ita nihil calumniando detrahens. Nec ferens calumniantes, ne pruriginem oris obliqui, patientiâ audiendi irritet: Omni tristitiâ felli in se & aliis adversa, & quâ potest remedium ac malagma offerens. Mœstos consolans, dubios firmans, & omnes vitæ nostræ fulgines abstergere quærens.

### De Urbanitate.

**I**Nter honestæ organa oblectationis, & curarum lenimenta, non ultima est Urbanitas. Ludibunda Virtus, risui sed & contemptui, ætati certè stativæ non omni apta. Interdum veritatem, quò alioquin non perventura erat, deferens, & sales vitæ aspergens, noxium aliquid, & cruentum abstersuros. Sed illa, si quicquam, tempore maximè juvatur, tempore valet. Ne rebus gravibus interstreat, ne inter seria nugetur. Et moderamine eget, ne offendat, quos quærit delectare: ut figat  
acu-



aculeum, sed dulcem; qui sentiat, sed cum voluptate: ut flosculos spargat, sed nativos, minime autem foetidi quicquam spirantes. Qui Veneri sed castæ, qui Virginibus etiam Musis probari possint. Nimium risûs pretium ducens, qui probitatis pudorisve constet impendio. Morositati quidem adversa, illi ex atris quasi nûbibus tristitia semper de-tonanti: sed & scurrilitati inimica, decoctrici ver-recundiæ, lenæ libidinum.

### De Morum Civilitate.

**N**on est satis, animum sermonemve ad honesti normam habuisse compositum. Externa quoque in publico viventi perpolire oportet, & Virtuti bellam etiam vestem circumdare. Animi habitaculum corpus est, & ex eo plerumque inter homines æstimari habitator solet. Qui cultâ domo, multas subinde in recessu sordes, incultâ, multa intus splendida abscondit; non habitura honorem, nisi à paucis prudentibus, qui pannosæ etiam, & vel nudæ Virtuti assurgunt. Igitur habenda omnino corporis cura est, saltem ut servi, in quo coli aut despici Herus solet. Idque adeo luci publicæ, & oculis hominum, non illorum, impexumve objici debet. Absit quidem in cultu cura nimis sollicita, virilem & serium animum parum decens: Vix foeminis permixta, quæ, jure quodam suo, corpori plus quàm animo fidere solent. Sed absit quo-

que negligentia, ne dissolutioni videaris affinis, alia pari incuriâ transmissuræ. In vestitu nihil luxui, aliquid consuetudini, plurimum gravitati detur; vitentur non novitate tantum offensura, sed & antiquitate, quæ ipsa quoque insolentiâ novitati par est: In motu corporis composita æquabilitas servetur, levitatis etiam umbra absit. In senibus imprimis, & verenda negotia tractantibus, quibus pondere autoritatis opus est. in honoris signis liberales simus, sed ea ne artem nimis, minimè verò fucum pleant. Gesticulatio removeatur à gestibus, qui elegantix commodentur, non histrionix. Affectatio procul sit, adultera ingenuitatis, & animum majoribus dicandum minutiis occupans frangensque.

## De Virtute Heroicâ.

**A** Nimi lumen Virtus, luminis illius fulgor quidam inusitatus Virtus Heroica est. Illa animo diem facit, pulsus quasi vitiorum tenebris, hæc diei ipsi serenissimum jubar addit. Illa bonos viros & honestos; hæc magnos, & amplius aliquid, quàm viros dicendos efficit. Unde & *Virtus divina*, quique eam assecuti sunt, viri appellantur Divini. Qui non vitium jam, sed virtutem ipsam, non fortem vulgarem, sed planè humanam superant. Et si consummati sint, vix quicquam hominis in se habent, præter figuram & mortalitatem, Sed ea ipsa  
Emi-

Eminentia Heroica, alto quidem semper, sed non æquè lato attollitur fastigio. Est ubi unius, alteriusve virtutis quasi tenui acumine, in sublime surgit. In aliis, sacri instar Templi, multarum aut omnium Virtutum complexu, cœlo latè subtenditur. Sed & alio fulgore, hoc sidus Heroicum inter gentes, alio in veri DEI cultoribus promicuit. In illis splendidissima quæque Virtus generis humani felicitati, sed terrenæ tantùm, serviit: In ferinâ hominum barbarie, noxiisque securitati publicæ monstris edomandis occupata. Quo in opere Thesei, & talium, præcipuè verò Herculis magnitudo enituit. In quem quicquid ubique magnificum est, antiquitas congescit, Herois fingens ideam. Sed conflatis in unum multorum decoribus, vix nisi fortitudinem Heroicam efformavit: Illam in arduis aggrediundis, terroribusque mortalium sub jugum mittendis spectatam: Cæterùm plurimis simul libidinum dedecorumque aliorum maculis deformem. Alii eorundem gentilium, diverso Itinere, sapientiâ scilicet, ad gloriam Heroicam evasêre. Artibus inventis, vitæ hominum ornandæ necessariis, aut mentem supra vulgi studia evehentibus, promulgatis item Legibus, societatis humanæ nervis, repagulis flagitiorum. Quarum rerum illis Æsculapius, Mercurius, Pythagoras, Socrates, his Minos, Solon, Zanolxis effloruêre. Æternæ claritudinis nomina, quorum aliqua, fortunæ majoris comes, adulatio & superstitio cœlo donavit. Græ-

cæ maxi-

ca maximè antiquitas multos fecit celebravitque Heroas: Thebanos præ aliis Trojanosve bellatores, Colchicos item Argonautas prædicans, Poetis credula, & his sacerdotibus, plurimos hominum, religionibus etiam inferens, colendos cultosque adeò ab æquè dignis, sæpè & dignioribus coli. Idque non suos tantùm intra fines, sed orbe penè toto, extra Populum DEI unius Cultorem. Qui ex Abrahamo ortus, DEI amico, vereque adeò viro divino, verè Heroe, Josephos post, Moseas, Josuas, Gedeonas, Jephtas, Samsones, Samueles, Davides, Maccabæos tulit; viros cœlo plurimum imputantes, & qui DEI, quò similiore, hoc mage famulos & organa se agnovere. Magna hi aggressi, sed sub cœli signis; suo periculo; sed ut divino honori consulerent. Quorum virtutem, sed majore & lumine illustratam, & roboratam instinctu, sub novo fœdere excepere posterì, Sangvinis ipsorum, & extra sangvinem, fidei ejusdem hæredes. Illi scilicet, qui unico DEI filio, verissimo DEO-Homini, patrum illorum magnæ spei, Generis humani Sequestro, Heroibus Angelisque ipsis adorando Regi, mancipati, auctoratique, emptas sanguine ejus animas, & inhabitata DEO corpora sua, ut templa, uni ipsi sacra devotaque semper, denique & in victimas, prompti obtulere. Homines inter tormenta ridentes, post flagra læti, mortem in lucro deputantes, divino amore penitus æstuentes, pro salute proximi quotidie venales; vera sanctitatis



tis exempla, specimina innocentiae, verae virtutis & felicitatis duces ac magistri. Malorum, bonorumque mundi contemptores; coeli, etiam in terris cum degerent, inquilini. Veri herôes, veri fundatores rei Christianae, cui destruendae certatim degeneres posteri incumbimus.

## De Origine, Causis & Effectis Virtutis Heroicæ

**N**on fortè aut casu, nec usitato Naturæ arbitrio industriâque nascuntur Herôes. Ut majores illi cæteris hominibus, ita ortui illorum vis se major humanâ interponit. DEUS, scilicet, qui alibi Naturæ multa permittens, horum natales curâ dignatur peculiari. Unde & nascentes illos prodigia sæpè vel comitantur vel antecedunt. Quosdam effœtæ, aut desperatæ saltem sterilitatis matres edidère. Quorundam etiam ortum angeli; ut Samsonis, Baptistæ; quorundam oracula, ut Moïsis, prædixère. Cyrum nasciturum Astyages, Alexandrum M. & Castriotum matres, Platonem Socrates somnio præsensère. Eidem Platoni nato apes ingessère mel; Pico Mirandulæ flammeus Circulus Caput circumdedit. Nec minùs liquidum curæ cœlestis argumentum præbet Ingenium, quo eminent Heroes. Non torpidum, nec tardum, sed agilitate naturam imitans Cælestium, Capax magnorum, vulgarium aspernans, ignavi Timoris, Suspicionis, Invi-

Invidiæ, doli omnis expers: clarescere per egregia cupidum, vinci ab aliis dolens, summis ubique honestissimo ardore imminens. Et id pueritia mox prodit, propior à stirpe, & fingendi nescia ætas: Ut in Themistocle, quem Pater magnum Patriæ vel bonum vel malum fore ominabatur: In Alexandro Reges collusores poscente, domante Bucephalum, Persarum Legatos ante pubertatis annos audiente; in Julio Cæsare, Syllæ multos Marios continere viso, & aliis multis, apparuit; in Hercule verò Serpentes elidente, in Ascanio apros Leonesque optante, figuratur à Poëtis. Etiam corpus plerumque eximium Herôes accipiunt, dignum illis metante Naturâ hospitium. Ut ex decore membrorum colligi possit, quantus illuc Spiritus intrarit habitator. Sic Heroibus suis Homerus, sic Æneæ Virgilius formam Diis similem tribuit. Sic Augustum, Trajanum, Theodosium, Carolumque Magnos, sic Castriotum rarum corporis temperamentum, & vigor Oculorum, honos Capitis, & dignitas pris, longè latèque principes ostentabant. Naturæ porrò muneribus, multum etiam in Heroibus Educatio addit, udæ & molli sublimis ingenii ceræ nonnisi pulcherrimas Virtutum inprimens formas: non delicatâ in umbrâ corpus, non voluptatum, saginâ animum exsolvens; sed severâ lege ad inediæ, vigiliarum, laborum patientiam durans: spontaneis juventam exercens lassansque operibus, quò necessariis pòst sufficiat. Ita Herculem crevisse tradunt, postquam

ex bivio in viam Virtutis pedem intulit. Ita Achillem, quem ideò Chiron Leonum visceribus, & ferarum medullis fingitur aluisse. Ita Alexander sub Leonida adolevit, laborum, quibus ipse insueverat, severo exactore. Ita Castriotus Amurathi bellatori obses datus, formidatus ipsi Amurathi bellator evasit. Ita, si recentia non fastidimus, Henrico Navarreo asperè habita juvenus ad merendum Magni nomen profuit. Plerumque autem, super internos Naturæ instinctus & educationis invitamenta, sapientiæ denique monitus, exemplis aliorum, quos Fama colit, stimulantur Heroës. Ita Macedonem, per Liberi Herculisque vestigia ardor æmulandi egit. Ita Themistocli Miltiadis Trophæa somnum, Cæsari Macedonis victoriæ lachrymas excussère. Nempè intus æstro honoris pulsantur, quo altissimos æquare cupiunt mortalium. Magnanimi ad grandia adspirantes; sine ambitione tamen, viis grassante illaudatis, quærunt probari, sed optimis; famæ, sed non adulanti, cœlo inprimis, quod spirant anhelantque. A quo & afflantur, spiritibusque accenduntur planè æthereis. Ita ut DEO quasi pleni, opera edant ore manuve mortali grandiora. Eodem accurante, magnis etiam occasionibus ad ardua excitantur. Uti cùm à magnis & perniciosis Erroribus, sceleribusve, liberandum est humanum genus. Cùm DEI in terris agenda causa, cum honori ejus commodanda Lingva, manus, sanguisve. Cùm magna orbis Imperia, à gente indignâ, in ali-

am

am transferre Numini lubet: Cùm ab Hostibus patria, cum oppressa Justitia à Tyrannide vindicanda est. Cùm Lerna confusionum Herculem, cum discordiæ publicæ Augustum postulant. Istiusmodi porro opera adorientes, singulari & extraordinario prorsus feruntur impetu, Qui feliciter ipsos, aliis omnibus stupore attonitis, reddit audaces, similesque celeritate fulminibus, nullo obice euntes retardante; & difficultatum nodis omnibus, vel ultrò cedentibus, vel cedere coactis. Quod si per longos laborum circuitus ad metam se vident duci, non deficiunt animo, non cedunt obstaculis, sed inardescunt, inter inimica omnia pleni fiduciæ, inter formidanda imperterriti. Eâ securitate Julius, periculum monstrante vectore, *Cæsarem*, inquit, *vehus*; eâ Alexander, *Dario* veniente, gaudet, quærendum non esse, quem vincat; eâ inter spicula Persarum Granicum tranat; eâ in oppidum hostile solus infiltrat; eâ David fundæ confidens, thoraces & gladios, nec minùs Gigantem contemnit; eâ idem inter specus latitans, & Saulo toties parcens, spem tamen regni servat; eâ Martyres inter fidiculas & ignes triumphant, & vicissè se clamant. Neque verò exitu optato spes Heroum, nec labores sine suo frustrantur. Non finit cælum organa gloriæ ipsius consecrata pudore suffundi. Cedit illis Improbitas tandem, viribus quantumlibet superbiat suis. Cedit quilibet causæ cælo probatæ hostis, quantumvis etiam insuperabilis visus: Cedunt concussi Orbis cardines,



nes, cum cedere hos, ipsius interest orbis; cedunt infestageneri humano mala, cedunt publicæ pestes mortalium. Subit felicitas seculorum, Heroas ut autores, sapè & ut victimas sequens. Quos tùm bonorum, quæ DEO duce peperêre, exfortes, beatâ gloriæ æternitate cœlum solatur.

## De Amicitia.

UT ad ignem ignis, ita ad Virtutem fertur rapiturque Virtus. Se illa legitimè adamat, se lubens fruitur, ipsa delictum, ferè &, ubi in ingratos incidit, stipendium sui. Adamat se autem, ubicunque videt, omnes ipsam habentes amplectitur, ut se amplectatur. Inde Amicitia oritur, pulcherrimus Virtutis fructus, felicitatis in terris & causa & pars præcipua. Verus vitæ Sol, verum secundæ fortunæ ornamentum, adversæ solatium. Omni ætati, omni hominum conditioni, magno-perè, & ferè non minùs Igne & aqua necessarium bonum. Sed ea non eosdem apud omnes perfectionis numeros habet, pluribus imperfecta contingit. Perfecta, rerum Divinarum humanarumque, summâ cum benevolentia, consensio est. Nempe in Divinis qui primùm conspirant animi, eorum tantò sanctius, firmitusque vinculum est. Deo quippe amicum necesse est credat, cui bonâ fide amicus esse vir bonus velit. Deo autem amicus est, qui verè credit & facere satagit, quæ credi fierive Deus per

per Spiritum Sanctum & per interpretem sui Ecclesiam jusfit. In cœteris aliqua ignorantia, aut simplex error Dei amicitiam non tollit, nec debet hominum. Consciens est optimus Opifex imbecillitatis humanæ, & quemque memorem decet esse suæ. Sed ab errantibus quoque dolus semper malus abesse, adesse in mēlius proficiendi studium debet. Virtutum cœterarum studium humanisne an divinis rebus accenseas, parū refert: dum constet, ab illo pariter originem & alimentum suum, trahere amicitiarum verissimas: & adulterinas esse, quæ parario non coaluerint Honestæ. Cui utile & jucundum adjungere licet, sed pro pedisse quis. Quæ præviam sequentes Heram ornant, malo vulgi errore Heræ isti fiunt præviæ. Cœterum amicum cum paras, diu te ipsi, ipsum tibi antè præpara. Nec modicum de illo delibera, cum quo omnia mox deliberaturus sis, quî cum pectoris tui intima & omnem propè fortunam communicaturus, cujus alloquio sollicitus, consilio dubius, conspectu ipso semper cum voluptate uti velis. Nec multos habere tales, ne amor velut in rivos divisum flumen, languescat. Cum ingressus es Amicitia Cancellus, quicquid amico contingit, tibi puta contigisse. Desideriis ejus honestis ne adversare, sententias approba, vel ser, vel corrige, vel tempera: Officiis certe pro virium modo, nihil pro ipso recusa, nihil abnue, tibi vel ipsi non pudendum. In adversis præcipuè fac, ut tanquàm ab igne exsplendescat constantia

stantia & fides amoris. Libenter coram vel per literas colloquere, ut usui coruscet amicitia, etiam ex longinquo. In consuetudine suavis esto, in sermone apertus, in secretis religiosè tenax. Non suspicax, non dissidens, non dicta illius, non facta sinistrè interpretans: non queribundus, criminatoribus verò amici adversus potius quàm credulus. Lauda palàm, privatim admone, defende quantum licet; quantum etiam potes, ubique novos tege & tolera. Honore præveni, consulentem audi, admonitiones liberas pro beneficio accipe. Denique in amore persevera, nec abjice amicum, nisi is bonam mentem abjecerit. Et si causæ amoris cessent, dissui tamen magis, quàm rumpi patere fœdus. Ne & amicum facilè perdas, & tanto acerbiorē post habeas inimicum.

### De Decoro secundum ingeniorum, ætatum, & vitæ diversa genera.

**H**Abes virtutis colores, quos ut plurimum illa, & quovis vitæ in genere gerit. Restant officia, quæ aliis alia lex decori præscribit: pro varietate nempe ingeniorum, sexûs, ætatis, conditionis. Hæc enim omnia Virtuti singularia & adjumenta & obstacula objiciunt. Ac primum Ingenii cujusque impetus & inclinationes probè expendendæ sunt. Ad quod enim bonum quodq; fertur, in hoc, nisi præpediatur, maximè proficiet: Velutque vento favente eò perveniet, quo aliis adverso, agrè  
C vel

velnunquam. Sed naturæ temperies, ut alios aliô, ita per se ad mala magis, quàm bona quemque impellit. Certè vix unquam ita æquali mixturâ composita est, ut ad bona quævis pari stimulet impetu. Si bilis flava prætumeat, celerem ad consilia & actiones, sed tumultuosum quoque & ferocem; si pituita, tardum gravemque, sed simul incautum, & occasiones in occipite prehendentem; si nigra bilis, ingenio pariter & labore validum, sed morosum, odii properum, & tenacem: Si sanguis, hilarum, benignum, sed ad voluptates, quàm ad seria rerum proniorem facit. Quisque igitur Temperamentum suum & noverit, & à vitiis sequestrare conetur. Eò melior futurus, quò illud à facibus suis liberius, & suscepto vitæ generi accommodatus habuerit. Jam Sexûs quoque disparitas, alia viris, alia foeminis munia imponit. Illos laboribus & periculis adeundis, dandis consiliis, habendis in publico sermonibus: Has custodiendæ, quàm parandæ rei, obsequio quàm regimini, verecundo silentio, quàm idoneæ ad publica orationi aptiores fecit. Quanquam Naturæ, seu errore, seu lusu producuntur interdum, quæ curis Virilibus viros superent. Ætatem si spectes, Juvenes affectibus fervidos calor, Audaces virium fiducia, incautos experientiae defectus, societati inhiantes fuga tristitiæ, æris prodigos spes reparandi, in vitium cereos junctim hæc omnia reddunt. Senes contra, frigus ætatis cupiditatibus obtusiores, consiliis lentos &

cautos

cantos efficit. Susplicaces quoque, diffidentes, frontis duræ, lingvæ solutæ, manus avaræ : Vitæ in ejus fundo timentes, & restanti vitæ modico multum viatici ut plurimum quærentes. Eò magis & juvenes, & senes, quòd ætate suâ rapiantur, cogitare oportet. Ut & illi nimio calori frœnû, & hi timidæ lentitudini, calcar addere memores sint. Sed in primis adolescententes cautè agere decet, quia in Vitæ quasi ingressu sunt: Inque eo flexu, ubi spes omnis reliquæ vitæ, vel exsurgere, vel suffocari potest. Sibi igitur nec parcant, nec blandiantur, alios recta monentes, rectèque præeuntes sequantur. Parentibus & præceptoribus morigeri, quibus cum nihil non reddiderint, non redditum tamen æquivalens credant. Rectam Educationem aliis omnibus præferant bonis, caducis semper, plerumque etiam, nisi illa præcesserit, magis nociturus. Tandem Fortunæ etiam & conditionis diversitas, variare in hominibus, genios & mores solet. Qvi genere eminent, dupliciter honorari quærunt, & in se avos proavosque simul coli. Meritò quidem, si æquè Virtutis, ac sanguinis aviti, se ostendant hæredes; nec in parietibus magis, quàm in animis, factisvè suis, gloriam majorum frinant splendere. Sed heu nimis multi, clypeos avorum, non nisi ad sordes vitiorum obtegendas gerunt. Ipsi statuis gentilitiis, quibus superbiunt, similes; Majoribus, quos male referunt, pudendi. Satis habentes, anteparto famæ incumbere, sæpè & decoquendo illi nimium intenti. Alios fastu, non Virtute præire, & premendo tantum inferiores sibi facere gnari. Quos æquant sæpè eâ in re novi homines, opibus & potentiâ supra genus suum pollentes. Quandoque & insolentiores illi sunt Nobilibus; melius his vi ingentia ferentibus fortunæ munera, quibus alteri, ut insuetis, facile inebriantur. Plerumque immodesti & jactabundi, & quò plus generi vel animo deest, hoc magis inanium ostentatores. Haud minus reliqua vitæ genera, diversis vultibus, & quasi morum coloribus, spectanda se præbent. Aliiter nempè moratos videmus sacrorum præfectos, aliter ci-



vili in dignitate positos. Aliter artium & sapientiæ studia professos, aliter vulgaribus curis vitam tolerantibus. Omnes suum habent campum peculiarem, in quo virtutis specimina dare possint. Omnes & lapides isthuc inveniunt; ad quos pede offeso prolabi facile sit. Beati, qui quaecumque obtigerit vitæ stadium, id ita decurrunt, ut pro brabeo alteram feliciter consequantur.

F I N I S.

## Admonitio Autoris

*de hac*

### QUARTA EDITIONE.

**C**haracter iste olim aliâ formâ & in modum elogi-  
rum editus fuit. Nec textu continuo procedebat ibi sermo, sed singulari linearum ordine singulos continebat sensus. Et alia periodorum connexio, alia sententiarum distinctio ibi cernebatur. Lineæ singulæ à literâ majore, etsi pendente adhuc sensu & cum priori lineâ coherente, inchoabantur. Idem in tertiâ editione, procul ab Autore, ad salam fl. institutâ, servavit Typographus, quamvis continuum sermonem fecerit, ubi in primâ editione lineis, prout elegia distingui solent, variegatum repererat. Unde periodos aliquando informes reperiet Lector; qui hoc quicquid est imperfectionis, absentia, non imperitiæ Autoris imputabit. Editio quarta aliquatenus corrigit, quod ibi peccatum est. Hoc quoque volo, ut scias, Lector, multa in hoc libello petita esse ex Platone, Aristotele, Cicerone, Senecâ, Plinio secundo, Verulamio & aliis. Quod addo, ne dissimulare me putes, per quos profecerim.

*Vale.*

STELLA  
AUREA

SE II


FAX VIRTUTIS

EX

Naturâ Stellarum  
accensa.

---

DANTISCI,  
Typis DAVID-FRIDERICI RHETII.



VETUS DEDICATIO.

*Pralustribus & summæ Spei  
Juvenibus*

VLADISLAO CASIMIRO

*E T*

JOANNI RAPHAELI  
GULDENSTERNIIS,

L. L. B. B. de Lundholm & Vogelwick,

*Illustrisfimi*

SIGISMUNDI GUL-  
DENSTERNII,

L. B. CASTELLANI GEDANEN-  
SIS, PRÆFECTI STUMENSIS, REGII

OECONOMIÆ MARIÆBURGENSIS AD

53886 MINISTRATORIS &c. FILIIS.

Sal.

**G***Randes & amplæ admodum sunt Virtu-  
tes, Generosissimi Adolescentes, quibus Il-  
lustrissimus Parens vester antiquo sum-  
morum natalium suorum respondet splendori, ve-  
stris*

strisq; simul ad eximia omnia conatibus, clarissima facis instar, pralucet. Eas equidem nec aetas adhuc vestra capere rectè, nec dignè exprimere, nisi meditatissima exercitata eloquentia oratio potest. Atq; idem ceteris dotibus suis admirabilem junxit modestiam, per quam suis ipse laudibus intercedit, nec celebrari decora sua patitur, rectè factorum conscientia contentus, ostentationi contra ita inimicus, ut nec speciem ejus ullam ferre queat. Sed praeclara ejus merita omni bonorum consensu aestimantur: quantique ea ipse SERENISSIMUS REX, DOMINUS NOSTER CLEMENTISSIMUS faciat, intimam jamdudum gratiam, nunc verò longè splendidissimo testimonio ostendit, dum illustri Castellani Gedanensis dignitate, ultrò & nihil quicquam ejusmodi ambientem, magnificè honorandum duxit. Sed hic unum ex multis laudum ornamentis, et si non ab omnibus pariter, à Sapientia tamen Candidatus magni aestimari solitum nominare, pace ipsius liceat, in literas & literatos propensissimum affectum. Quem ab ipsis tenera aetatis tyrocinis tantum semper ostendit, ut etsi aliis subinde à fortunâ captaretur lenociniis, nullum tamen suavius, nullum frequentius unquam com-

mercium, quàm cum Sapientie studiis, habuerit. Hec domi adolescens, hac peregrè juvenis, hac vir pariter, inter ipsos etiam Aula Militiæq., in quâ utrâque diu versatus est, strepitus, non neglexit. Atq. ut idem, quæ singula Nationes doctrinarum arcana habent, rectius perciperet, omnium penè, quas Europa novit, linguarum notitiam singulari sibi industriâ comparavit. Porro sapientiæ Doctores quantum semper honorem habuit? Nec iis tantum, quorum magisterio cultum animi sui debet. Nam istorum sanè eruditionem & meritâ gratissimâ semper memoriâ prosequitur: aliquorum etiam gloriæ ita favens, ut, ipsos laudando, sibi quodammodo delicias facere videatur. Quod ipse toties præsens comperi, cum doctum inprimis Virum Matth. Berneggerum, Profess. olim Argentinensem, occasio aliqua sermoni inseruit. Possem alios quoq. nominare, quos ob solam pariter eruditionem, non plurimum tantum æstimat; sed interiore etiam amicitia dignatur. Possem inter ceteros me quoque apponere, qui, ex quo inter Regiæ inaugurationis sol'ennia, Cracovia Anno 1649 celebrata, ipsi innotui, beneficium ejusdem patrocinium perpetuò inde (quod præfiscinè dixerim) expertus sum.



*sum. Ille Regiæ mihi gratia primus conciliator, ille apud alios haud paucos Regni Magnates, benevolentia pararius fuit : Ille privatim, inter adversa æquè ac prospera sua, multis luculentissimis pignoribus singularem mihi testatus est favorem.*

*Cui benignitati quid debeam, jamdudum quidem cum curâ expendo, quid retribuam, haud invenio. Nam nec Musæ meæ, etsi suo isti Mæcenati supra spem & meritum suum placere hætenus, quicquam tantis beneficiis dignum rependere possunt. Ut tamen, quæ æquare vix unquam licebit, agnoscere saltem videar merita, animum ab illo ad Vos deflecto, quod & proclivius esse sentiam, etatem vestram, quæ magna nondum fert, nec postulat, mustaceo aliquo devincire, nec ineptum tamen sit, parentum magnitudinem in sobole suâ, velut parte & imagine nativâ, venerari. Præterea autem nihil gratius vobis vel utilius offerre me posse arbitror, quàm Virtutis hortamina & ad aliquam Nominis ac generis vestri splendore gloriam invitamenta. Non quod deesse ea vobis credam, quos domi vivæ vocis efficacissima undiq; circumsonant præcepta, quos etiam citra hæc, stimulis arcanis*

Et Pater Æneas & Avunculus excitat Hector.  
*Sed quia Italium copia apud erectissimos etiam  
 quosq; animos nunquam potest esse nimia: ac por-  
 rò efficacius penetrant, quæ ab alio atq; alio, mo-  
 dis diversis proposita, speciem habent novitatis,  
 etsi idem cuncta ingeminent. Neq; mihi inju-  
 candum est, ad ejusmodi Studiorum juveniliū  
 quasi crepundia, vestri causâ, redire: quia sic me  
 sentio aliarum occupationum severitatem pulcher-  
 rimè identidem diluere. Porro cū in Palæstrâ  
 Nobilium aliqua NATURALIS REIPUBLI-  
 CÆ lineamenta ducere ceperim, non sine spe &  
 voto, quòd ibi orsus essem, pertexenai: Operis ejus  
 alterum jam specimen in STELLARUM NA-  
 TURA cò lubentius edo, quòd in eadem Nominis  
 simul vestri fulgor nitescit. Censeant Cassii,  
 quantum voluerint, latiores has Operas: mihi  
 vestrum & commodum & decus honesto conatu  
 successuq; provehenti, nunquam vel consilii ratio,  
 vel laboris fructus displicebit. Valete, Generosis-  
 simi Adolescentes, & tum mihi, tum propter me,  
 filio meo, qui Illust. Parentum vest. indultu, sub e-  
 odem jam vobiscum ungue, primum in studiis  
 vultum ducit, porro favere pergite. Dab. Ged.  
 IV. Cal. Octob. Anno 1656.*

JOACH. PASTORIUS,  
 Secret. & Hist. R.

# STELLA AUREA.

## CAPUT I.

*In quo Præloquium de Nominibus omnium faustis.*

**S**Ocrates, magnum illud humanæ sapientiæ oraculum, Virtutis incrementa adeò undique & quærebat ipse, & ab aliis quærenda judicabat, ut nec speculum intueri juvenes vellet, quin meliores inde redderentur. Si enim illo indice formosos se cognovissent, dandam esse operam suadebat, ne specie liberali, beneficio naturæ non contemnendo, sese ostenderent indignos. Sin displiceret forma, eniti volebat unumquemque, ut quod corpori deesset; animi dotibus pensaretur. Quem à speculo stimulum præclarus ille morum formator capi volebat, eum ego tanto majori jure à Nomine capi posse ac debere existimo; quanto ad id audiendum expendendumve, quàm ad speculum consulendum; crebrior datur occasio. Istud vix ferè inspicere solent, nisi qui plusculum curæ & temporis corporis cultui impendunt. Nomen suum nemo non aut inscribit identidem literis librisve, aut ab aliis ingeminari audit. Tum si speciosum illud videatur, eò elaborandum est, ut mores nostri & facta pulchro congruant titulo: si secus, ut, quicquid in nomine displiceat, virtutibus emendemus. Profanarum gentium circa nomina & impositio-

nes & explicationes superstitiosam sollicitudinem, ut non ignoramus, ita & cavendam censemus: At interim non omnia etiam nomina fusque deque habita, vel habenda esse, ex ipsis quoque sacris intelligimus oraculis. Proavorum nostrorum temporibus Galeotus Martius, Vir eximius, Matthiæ Corvini Bibliothecarius, libellum scripsit, de doctrina promiscua, cujus primo capite nihil aliud docetur, quàm propria hominum nomina ab astris imponi. Atque istic magnis illis tum Sapientiæ atquè artium Dictatoribus, Aristoteli, Galeno, Hippocrati, tum Reip. Rom. luminibus, Camillo, Scipioni, Cæsari, Pompejo, Tullio, non sine auspice cœlo, & adgubernantibus fati, nomina ista contigisse ostendit, quia illa alioquin virtutibus factisque eorum Virorum non fuissent tam belle responsura. Quæ viri doctissimi sententia an omni ex parte vera sit, nolo ego nunc pensiculatiùs examinare. In multis sanè magnam ea habet veri speciem. Nec ab illâ Ausonius abludit, qui nomina ominosa à mente divinâ, hoc est futurorum præsciâ, dari innuit, cum ait:

*Qui prius Meroe nomen tibi contulit, ille*

*Thestide nomen condidit Hippolyto.*

*Nam divinare est nomen componere, quod sit*

*Fortunæ, morum, vel necis indicium.*

Et fuisse apud Romanos fausta aliqua, alia infasta nomina, satis ex Tacito apparet: qui ad reficiendum Capitolium adhibitos ait milites, quibus *fausta nomina*. Apparet idem ex Festo, qui asserit in Dele-

Et censuere, ominis boni gratia, primos nominatos *Valerios, Salvios, Statorios*. Quod idem adductis ex Cicerone, Plinio, Plauto, locis uberius Lipsius demonstrat in notis ad Tacitum. Fausta autem nomina haud dubiè appellabantur, quæ aliquid boni significare ac portendere viderentur. Uti Valerii nomen à Valendo, Salvii à Salute, Statorii à Jove Statore ductum nihil non fausti credebatur ominari; quemadmodum contra Lentuli, Bibuli & similia nomina inter læva & improspera habebantur.

Vestrum, Generosissimi Adolescentès, nomen Gentilitium jure meritò inter faustissima censuerimus. Duabus enim ex rebus præstantissimis conflatum est, quarum altera in cœlo, altera in terris fulgidissimè splendet. Quid enim æther post DEUM & cœlestes spiritûs, STELLA pulchrius, quid AURO nitidius terra continet? Tanto magis gaudere Vos tali appellatione, tantò etiam acriùs stimulari illà ad virtutem & res egregias oportet. Cogitate, ad vos quoque pertinere, quod Cassiodorus lib. VIII. ep. 18. Amico scribit: *Sumpsisti nomen ex meritis. Custodi, ut semper lateris veritate vocabuli. Nam cum omnis appellatio ad declarandas res videatur imposita, nimis absurdum est, portare nomen alienum, & aliud dici, quàm possit in moribus inveniri.* Sed ut, quæ in nomine seu omniavirtutis seu incitamenta latent, eò meliùs percipiat; age ea, quia nunc vacat, paulò diligentius evolvam, nihil aliud quàm vestrum in honesti & gloriæ orbitâ profectum quærens. Quod ideo præmo-



neo, ut iniquos se fore sciant, si qui vestræ Domûs, decora, in Stellæ luminibus hîc lucentia, invido oculo ; si qui etiam me, assentationis, fœdisimi vi-  
tîi, & à quo indoles etiam mea me eximium esse vò-  
luit, suspicione perstringere voluerint.

## CAPUT II.

*Stella nomen rebus divinisimis & præ-  
stantissimis datum.*

**M**ultùm jure meritò stimulare vos, Generosis-  
simi Adolescentes, Sideris gentilitium nomen  
vel ideò debet, quia id non tantùm per se corpus  
fulgidissimum, cœleste, adeoque apprimè nobile  
significat, verùm etiam, quia ad res alias grandes  
& præclaras significandas transferri atque adhiberi  
solet. Prorsus ut, quoties aliquid eximium & ma-  
gnificum dicere volumus, ei sideris vocabulum ple-  
rumque aptare gaudemus. Neque facilè majus  
encomium cuiquam tribui posse putamus, quàm u-  
bi eum seu gentis suæ, seu artis *Sidus* appellaveri-  
mus. Sed & in sacris nomen istud maximis qui-  
busque rebus videmus accommodari. In Apoca-  
lypsi Joannis quando summam & dignitatem & be-  
atitudinem ejus, qui constanter in sanctissimâ fidei  
professione perseveraverit, magnifice exprimere  
cupit Servator, *dabo*, inquit, *illi stellam matutinam*. Id  
est, dabo illi, ut stellæ matutinæ instar luceat. Ep-  
dem stellæ nomine septem Episcopi in Apocolypsi.  
(c. I. v. 1. & III. 1.) & postea ipsi etiam Apostoli si-  
gnantur. Angeli porrò stellæ matutinæ vocantur  
à Jo-

à Jobo cap. XXXVIII. 7. Sed denique ipse Rex & Dominus Angelorum Christus JESUS idem tulit nomen. Nam & stellam matutinam semet ipse vocat in eadem ante laudatâ Joannis revelatione, cap. XXII. 16. & per stellam de Jacob, de qua Bileamus vaticinatur, Num. XXIV. 17. neminem alium potius, quàm expectatum illud semen Abrahæ, sidus gentium, mundi Servatorem intelligendum constat. Etsi enim ad Davidem quoque, Christi patrem & Typum, idem Bileami vaticinium pertinere possit, sensu tamen pleniori augustiorique referri debet ad illum, qui idem & filius Davidis & Dominus est.

## CAPUT III.

*Magnis viris Stellarum nomen, eruditionis quoq; & sapientiæ respectu. tributum.*

**M**ulta sunt decora atque ornamenta, quibus enitescere Virtus humana potest, nec uno modo ad celebritatem Viri egregii solent eniti. Alios facinora Martia nobilitant, alii sapientiæ studiis, alii aliis modis inclarescunt. Neque verò, quæ vita melior sit, aut facilius altiusve provehat homines, disputare jam volo, cum ea res non æqua omnium judicia experiatur. Et video, nullam viam esse tam felicem, ut omnes, qui eam ingressi fuerint, perveniant ad culmen, quod spe votoque occupaverint. Mihi illud jam tantum innuere lubet, Siderum nomen non Viris tantum tributum esse, qui aliis fortioribus modis, etsi forsan plus splendoris habere visis, emerferint. Sed in titulo isto dando plerumque

que etiam doctrinæ & sapientiæ habitam rationem. Si illos, quos paulò ante adduximus, penitus intueamur, prope omnes stellarum appellationem ob sapientiam possedere. Et cum Servator noster sidera de cœlo lapsura ait, virorum eruditorum plurimi de sapientiæ Divinæ Doctõribus sermonem esse arbitrantur. Daniel certè eos, qui sapientiam alios docuerint, veluti stellas cœli vaticinatur fulsuros. Et nempe isto tam illustri honore non alii potius digni à DEO habiti sunt, quàm qui doctrinæ cœlestis faciem hominibus cæteris alluxerint. Sed si alios quoque celeberrimos viros consideres, eorum plurimi clarum, quod possident, nomen solâ scientiarum & artium excellentiâ sibi peperere. Quod de Platone, Aristotele, aliisque omnium sæculorum viris eruditione præstantibus constat. Sed & in cæteris magis splendidis vitæ generibus, ipsisq; honorum summis fastigiis quò magis quisq; inclaruit, hoc idem plus plerumque hausit de studiis. Inspice magnos illos Orbis domitores. Alexandrum, Julium Cæsarem, Carolum Magnum. Omnes sanè bonarum artium disciplinis non tantum, sed penitus imbuti fuere. Et forsanes tam magnas & præclaras non gessissent unquam in orbe terrarum, nisi ab artibus honestis & stimulum egregium, & adjumentum insigne habuissent. Augustum Imperatorem pariter eloquentiam & liberalia studia ab ætate prima cupidè & laboriosissimè exercuisse, ait Svetonius. Quæ res ei haud dubiè

dubiè multum postea profuit, cum novum Imperii jugum infvetis Romanorum cervicibus, blandissimâ manu, & penè non sentientibus imposeret. Roberto & post illum Alphonso, Regibus clarissimis penè supra Regnum æstimatæ fuère literæ. In summo certè apud illum honore Petrarcha & Bocatius, apud hunc Valla, Panormita, Trapezuntius, Jovianus Pontanus fuère. Quanto Politianus in pretio habitus sit à Laurentio Medice, quanto à Francisco I. Budæus, Robertus Stephanus alique id genus, non est opus commemorare, quia res hæc nimis jam nota est. Joannes Dantiscus vir obscuræ originis, eruditione suâ magnam sibi gratiam apud Sigismundum I. Poloniæ Regem, nec non apud Carolum V. Imperatorem comparavit. Ab illo certè Insulâ Varmienfi ornatus, & ad intima consilia ac legationes adhibitus est. Hic verò adeò dilexit hominem, ut cum abdicato imperio omnes Principum legatos dimisisset, solum Dantiscum in Hispaniam secum duxerit. Unde eum tandem, cum aliis omnibus benevolentia ac honoris officiis cumulatam, tum Hispanicæ etiam Nobilitatis insignibus, quæ rarissimè externis conferri solent, dotatum dimisit. Sed minus fortè vulgatum, tantòque adeò dignius relatu est, quod ex antiquo auctore Pausaniâ refert Muretus in variis lectionibus. PAUSANIAS, inquit, in Atticis narrat, Athenienses, quod à Pindaro in Asmate laudari essent, tanti fuisse ampli illius ac grandiloqui Poetæ testimonium, ut & dona ei

ob id

ob id plurima miserint, & statuam in Civitate suâ statuerint. Non igitur mirum est, si illis temporibus multi ac præstantes Poetæ fuere, cum, qui eâ facultate excellebant, & maximis muneribus honestarentur, & honoribus amplissimis tractarentur.

## CAPUT IV.

*Stellis antiquitus summus honor habitus.*

Magna semper Mortalium circa cœlum & sidera sollicitudo fuit; Naturâ ipsâ excitatissimum quemque animum ad suspicienda, quæ supra nos sunt, stimulante. Et nonnullorum quidem intra debitos fines cura stetit: ita ut gloriæ Conditoris cederet, quantumcunque in contemplatione cœlestium laboraretur. Quales speculatores inter primos recentis mundi incolas, Sethi fuere posteri: antequam nimir. gliscente cæterorum superstitione, corrumperentur. Nam mox ab initio profanâ quorundam temeritate rapta in transuersum est siderum contemplatio, & majoribus augmentis abusus ejus, quam verior usus, crevit; ita ut plurimi mortales non eò, quò par erat, proveherentur contemplando, sed in sideribus ipsis, quasi ultimâ metâ, figerent obtutum; honoremq; tandem, quem stellarum & rerum omnium Auctori deberent, stellis deferrent. Moti haud dubiè (ut alias jam taceam causas) efficaciâ ingente, quam haberent cœlestia illa corpora in res inferiores, Sol inprimis & Luna, cujus utriusque vim beneficam



ficam quolibet momento terra & ejus habitatores omnes experirentur. Miscuit se superstitioso siderum cultui alia erga principes viros adulatio, ita ut in sideribus se adorare arbitrarentur, quos ipsi credulâ fide, aut impudente mendacio sideribus inseruissent. Nihil enim usitatius erat, quàm ut, quos in terris Viros virtute insignes, aut imperio potentes, præ aliis coluissent, postea in Deos referrent, & Divino honore prosequerentur. Ita ut verè à Manilio dictum sit:

*Terræ composuit cælum, quæ pendet ab illo.*

Inter alios ipsi quoque rerum cœlestium speculatores id curæ & laboris sui pretium tulere, ut inter Numina colerentur, postquam mortalitatem exuissent. Nam & Saturnum & Jovem & Hyperionem & Mercurium, Herculem porro & Bellesphontem, aliosque ejusmodi plures cœli primum speculatores, postea opinione gentium possessores, quosdam & Rectores factos, viri antiquitatis periti asserunt, atque inter eos Cl. Gassendus in præfatione super Tychonis Brahei vitam. Sed abierit sanè & longissimè quidem ultra fines legitimos tum astrorum superstitiosa inspectio, tum Virorum virtute eminentium reverentia, quippe in DEUM, Astrorum & Virtutis autorem, injuria. At non ideò tamen homines aut omnem siderum curam jure abjecerint, aut magnorum Virorum Virtutem honoris reliquerint expertem, ac velut incuriâ transmiserint. Auferatur, quod modum  
legi-

legitimum excessit, quod justum & æquum est, servemus. Meretur Virtus coli, nec major injustitia committi potest, quam ubi illa non agnoscitur æstimaturve, uti oportet. Nam etsi

*Ipsa quidem Virtus sibi met pulcherrima merces;*  
etsi etiam, quod Horatius ait:

*Repulsæ nescia sordida  
Intaminatis fulget honoribus,  
Nec sumit aut ponit secures  
Arbitrio popularis auræ:*

haud tamen permittere debent mortales, ut ipsa illa domestico tantum Theatro plaudat sibi, aut publico generis humani bono, suo militet stipendio. Infamia seculi est, cum Viris præclaris suis non datur honor, cum pulchra & salutaria egisse, non prodest, cum Vatiniis posthabentur Catones, cum patriâ Rutilii, cum Scipiones exulant. Quod si quæ autem Virtus in tam infausta tempora incidit, non ideo illa suum amittit pretium. Quin tantò major ejus æstimatio in animis omnium bonorum erit, & ipsius famam negatus intendet honor. Sed nec deerunt qui vel in tenebris latentem publico gloriæ theatro fistant: & ubi etiam ex oculis sublata ea fuerit, tantò & ardentius quæretur, & æstimabitur candidius. Tandem denique, si memoriâ fortè ac lingvis hominum exciderit, in fide annalium virefcet, unde illam

— — — — — *nec Jovis ira, nec ignes,  
Nec poterit ferrum, nec edax abolere vetustas.*

CAPUT

## CAPUT V.

*Stella pars & ornamentum Cœli est.*

**D**E Stellarum naturâ alii aliter, nec eodem modo veteres, quo nostri ævi autores philosophantur. Quorum omnium sententias examinare non est instituti mei, nec temporis, referre. Cœlestia corpora esse, omnes consentiunt. Stoici easdem Jovis dixere partes, teste Augustino de Civit. DEi lib. 4. cap. 11. Quod equidem inter prima infantis sapientiæ capita referri dignum sit, nisi explicatione juvetur, ut nempe per Jovem æther stellæque adeo ætheris partes esse intelligantur. Pariter benignum interpretem requirunt iidem de Stoa magistri, cum stellas vocant corpora divina ex æthere composita. Quicquid sit, nobilissimæ & à DEO ipso inhabitatæ substantiæ, cœli nempe, pars nobilissima stella est, vel ob lucis splendorem, quo alias cœli partes longissimè superat. Videamus jam, quid cum stellis hâc in re viri magni & in Republ. illustres habeant commune. Illæ ejusdem aut saltem cognatæ naturæ sunt cum cœlo; pariter isti nobilissimi generis esse solent ut plurimum, nonnunquam & Joves ipsos, h. e. supremos Principes affinitate sanguinis contingunt. Id quod de pluribus equidem clarum facere in proclivi foret, si vel necessarium id esse crederem, vel copia magis quam brevitati studerem. Sufficiet mihi vestram, Generosissimi Adolescentes, obiter hic gentem attingere; quæ uti antiquissima, ita Regio sanguini non

uno modo innexa est. Originem illa primum ex Daniâ traxit, in quâ multis retrò seculis amplissimè floruit, sic ut istic Guldensternios, supremis Regni muneribus honoratos legamus. Inter alios Ericus Nili filius Regni Mareschalcus fuit. Nec posterioribus temporibus exolevit ibidem familiæ decus. Nam Tychonis Brahe, nobilissimi Astronomi ævo, Axillus, (vel, ut alii. Axelius) Guldensternius Norvegicæ Prorex fuit, cujus mentionem in vita Tychonis facit præclarus Mathematicus Petrus Gassendus. Primus è Daniâ in Sueciam nomen istud Ericus Guldensternius intulit; cujus viri eximias virtutes vel inde æstimare licet, quod Caroli VIII. Suecorum Regis, principis virtute, quàm fortunâ majoris, Gener. & juxta Vicarius esse meruit. Regni enim Archi Dapifer (vulgo Trotzet) fuit, quæ dignitas uni Regiæ ibi secunda est. Ejus Erici ex Christina Caroli VIII. genitâ filii & nepotes inter Regni patrii senatores locum habuere, pronepotes ultra progressi. Nam unus eorum Georgius Regni Architalassus, alter Nicolaus trium Regum Cancellarius, & tandem pariter Archidapifer, adeoque Regni Primas fuit. Familiæ porrò Regiæ eundem novo vinculo Uxor Ebba Bielkia illigavit, soror Gunnillœ, quæ postrema Serenissimi Joannis Svecorum Regis conjux fuit. Ex Bielkiâ Nicolaus filios tres, & in iis Avum vestrum Joannem progeniuit. Qui sua & Majorum virtute illustris novum decus genti suæ intulit, ductâ in matrimonium Sigfridi, Petri  
Brah

Brahei Comitis in Visingsburg, Regni Sveciæ Mareschalci filiâ, foeminâ eximiis ornamentis illustri.

Matrem ea habuit Beatam à Stenbock, sororem Catharinæ, quæ Gustavi I. Regis Sveciæ tertia Conjux fuit. Avia eidem Sigfridi contigerat Margareta, Regii itidem sanguinis, quippe Gustavi Soror. Tot tantisque vinculis regnatrici Domui aliisque præcipuis innexus Avus vester, vir suâ insuper indole haud spernendus, ad summa haud dubiè in Patriâ emergere potuisset, nisi Sigismundi Regis partes amplexus, eundemque in Poloniam cum binis fratribus secutus esset. Multùm illi tali affectûs sui fideique constantiâ Serenissimorum Principum ac Regum nostrorum domum devinxere; unde & horum constantem vicissim erga se benevolentiam experti sunt. Aviam utique vestram, genere Braheam, Serenissima Princeps Sveciæ, Anna, Sigismundi Regis soror, singulari prorsus amore complexa est. Idemque; affectus post Braheæ istius fata (neque enim illa extra Patriam diu superstes mansit) in sobolem derivatus, non permisit huic vel orbitatis vel exilii mala sentire. Nam filios, in quibus Parens vester erat, liberali maternaque prorsus curâ in literarum studiis, domi, & apud externos denique in contubernio Mauritiæ Principis Auriaci per triennium educari curavit. Filiam verò Annam penes se eò loco & numero habuit, quo cognatum sanguinem principes habere solent. Uladislai porrò Regis curâ effectum est, ut quotquot ex iis, qui Si-



gismundum secuti erant, in Poloniâ superessent, inque illis adeò prælustris Parens vester, cum omni posteritate suâ, in Comitibus publicis, illis scilicet, quibus anno ineunte 1633. Uladislaus Regium diadema suscepit, jus indignatus Polonici, & sic ad quosvis Regni honores aditum acciperent. Quorum prælusionibus jamdudum Parens Vester fruitur, ad majora, quæ meruit, identidem destinatus, & certò perventurus, nisi Fortunæ, ornamenta sua comiter offerenti toties repulsam dedisset, toties adhuc, daret. Quod si Materni quoque generis vestri decora explicare vellem, lucem luci addere viderer. Magnus enim Cemarum, quorum ultimus sanguis Illustriss. genetrix vestra est, splendor in hoc Regno à multis sæculis fuit, idemque in supremis Palatinorum Castellatorumque dignitatibus, quas ii serie inabruptâ gesserunt, apprimè fulsit. Jam Lesciniorum quos eadem inter maternos progenitores numerat, quæ eminentia sit, quæ generis altitudo, dictum à nobis alibi est, & vel tacentibus nobis, satis se omnium oculis honor Illustrissimæ gentis ingerit. Eò magis autem elaborandum Vobis est, Generosissimi Adolescentes, ut tanto, quo nati estis, genere vos indies digniores efficiatis. Nonnisi enim ad ignominiam & dedecus facit claritudo generis, nisi pari posterorum virtute continetur.

## CAPUT VI.

*Stella in sublimi posita lucent mortalibus ;  
& præcipuè per noctis tenebras.*

Sidera in alto magnus ille rerum Opifex suspen-  
dit, quia mundi esse luminaria, adeoque obtutui  
omnium patere debebant. *Cælo hærent, terris lucent:*  
quod à stellis translatus Gallus quidam nuper ad  
Reginam Galliarum emblemate applicuit, ad pieta-  
tem nempe ejus alludens. Magnates pariter in su-  
blimi degunt, & stellarum instar, aliquantisper for-  
san se oculis subducere hominum possunt, diu aut  
semper non possent, nec debent. Non debent,  
quia operâ eorum, & exemplo reliquus Orbis indi-  
get. Lumen nimir. suum, quod à DEO accepere,  
commodare seculo tenentur, quia id alioquin fru-  
stra acceperint. *Non accendi lychnum,* monet Serva-  
tor, *ut sub modio recondatur, sed in candelabro collocari*  
*solet, ut luceat omnibus.* Id verò meritò ad se quoque  
trahunt, quotquot publico prodesse possunt, & cò  
magis viri summates, quò hi pluribus sese utiles es-  
se noverunt. Sed nec possunt etiam plerumque  
latere illi, quantumcunque velint. Ut adamas vel  
in occulto latens sese prodit luce suâ, ita istos sua &  
virtus & fortuna omnium oculis subjicit, nec ulla  
cura aut solitudo ita obstruere aditus potest, quin  
eosdem seu curiositas humana penetret, seu neces-  
sitas consilium opemque poscentium recludet. Ne-  
cessaria enim plerumque virorum ejusmodi opera  
est: & quemadmodum luce carere Orbis non po-

test; ita nec magnorum Virorum virtute ac ministerio. Olim Atlanti vel Herculi cœlum fingitur incubuisse, sed verius istis regnorum provinciarumq; moles plerumque innititur. Trojam vidimus sine Hectore defendi, sine Achille & Ulyssæ capi non potuisse. Adcò multum sæpè in unius Viri excellentis virtute situm est. Porrò autem, ut in tenebris siderum fulgor maximè & utilis & conspicuus esse solet: ita per calamitatum publicarum caliginem maximæ quoque virtutes exsplendescunt.

*Hectora quis nosset, si felix Troja fuisset?*

*Publica Virtuti per mala facta via est.*

Sic Themistocles, Epaminondæ, Camilli, Scipiones, aliique hoc genus viri nunquam ita magni extitissent, nisi Patriæ calamitas virtuti eorum & campum & lucem dedisset. Sed hac de re nolo nunc plura. Vos Generosissimi Adolescentes, cum in excelsò, siderum instar, ævum olim acturos vps audiatis, tantò enixius excolendos vobis animos putate, ut in publica luce, quam pulcherrimè olim, ubi ætas patietur & res publica exiget, virtutes vestræ enitescant.

## CAPUT VII.

*Stellæ, ut Cœlum, enarrant gloriam DEI.*

**Q**Uod de cœlo & firmamento universim ait Propheta Regius, Psal. VIII. id simul de Stellis intelligi potest, *quod enarrent gloriam DEI.* Quo haud dubiè id innuitur, eos, qui cœlum & stellas  
penfi-

penficulatiùs contemplantur, ad DEUM duci,  
quippe

*Qui sibi pro velo nitidi tentoria cœli  
Et liquidas curvo suspendit fornice lymphas.  
Et levibus ventorum aliis per inania vectus  
Frenat, ceu celeres, volitantia nubila, currus.*

Ut ita stellæ. etsi mutæ, DEUM tamen & pietatem doceant: exque rectè intuentibus veluti faces quædam ante altare Divinum stare videantur. Si Pythagoram aliosque quosdam Philosophos audire luberet, statuendum esset, stellæ alia etiam excellentioriratione & omnino per se ipsas laudare DEUM. Et in eâ prorsus sententiâ sunt Hebræorum Doctores. Quod multis testimoniis docere possem. Sed unus Maimonidæ, cujus præcipua inter eos & eruditio & autoritas est, suffecerit locus, quem hic Latinis tantum verbis adducere placet. Ita autem ille in Misna: *Omnes stellæ & spheræ sunt animæ. scientiâ & intelligentiâ præditæ, vitâ item & consistentiâ* Agnoscunt enim, *cujus jussu mundus factus est. Singulæ earum secundum magnitudinem & dignitatem suam laudant & condecorant creatorem suum sicut Angeli. Et sicut agnoscunt DEUM Opt. Max. sic cognoscunt etiam seipsas, & Angelos, qui sunt supra se. Est autem scientia stellarum & Sphærarum minor scientiâ hominum, hæcenus Maimonides.* Cæterum etsi eò non progrediamur, ut Stellis rationem potentiamque aliquam internam DEUM laudandi tribuamus: non levi pendendum tamen putamus, quod ad gloriam DEI illustrandam, quale-

cunque illud sit, aliquid conferant. Et meritò vos quoque, Florentissimi Adolēscētes, ad animum hoc revocatis, quoties nominis vestri memoria subit. Adeoque hinc stimulum sumere debetis ad Pietatis veræ, solidæq; cultum, qui veræ fidei inixus, veræ sapientiæ & omnis reliquæ virtutis fundamentum est. Nec sine illà quisquam hominum vivere beatus potest. *Omnia prospera eveniunt colentibus DEUM.* (ita enim Romani hominis dictum flectere liceat) *adversa spernentibus.* Inprimis verò eo quoq; pietatis ardorem ostendetis, si nunquam terrena cœlestibus præhabueritis. Siderium vobis nomen contigit, tantò magis ab humo ad sidera allurgere debetis. *Angustus est animus,* ait Seneca, (*Quæst. natur. præfat.*) *quem terrena delectant.* Et idem, rem contemptam, dicit, *esse hominem, nisi se supra humana erexerit.* Cogitate brevis ævi, fragilia & caduca esse, quæcunque vel maxime splendētia hic Orbis ostentat; quod in cœlo nos expectat depositum, perenne & æternum fore.

## CAPUT VIII.

*Stellæ omnes majores sunt quàm videntur,*

**N**ON est mihi propositum, siderum hic omnium metiri aut explicare magnitudinem. Lubenter enim istam curam diligentioribus rerum cœlestium contemplatoribus remitto. Mihi satis est, dixisse, sidera diversæ quidem molis, sed plerasque tamen



men terrâ majores paucissimas eâ minores esse. Neq; enim assentiri possumus Alphragano, qui statuit, stellam in cœlo vix visu notabilem decies octies, superare terram. Nam Tycho Braheus & alii asserunt demonstrantq;, stellarum aliquas non æquare magnitudinem terræ; at interim exiguo numero istæ sunt.

Reliquæ omnes immane quantum mole terram excedunt. Verum non omnibus ista earum magnitudo conspicua est, imò & fidem vix reperit apud eos, qui sensum, quo res metiuntur, idoneis non juvant instrumentis. Solem ipsum, quem toto terrarum orbe multò majorem probat ratio, acies nostra ita contraxit, ut sapientes viri pedalem esse contenderint, ut ait Senec. lib. I. nat. quæst. Ad eundem modum virorum excellentium magnitudo non ab omnibus aut agnoscitur aut æstimatur, sæpè ideò, quòd ipsi virtutes suas aut vires non adeò cum curâ explicant ostentantve. Neque enim omnes Mutiano similes, qui *omnium, quæ diceret atq; ageret, arte quâdam ostentator* erat. (Tacit. hist. II: 80, 4.) Malunt quidam, *quæ agenda sunt, agere sine ostentatione agendi. & actu otiosis similes videri.* Qualem Julium Agricolam Generi stylus deprædicat, quem, ait, *tranquillitatem atq; otium auxisse, cultu modicum, sermone facilem, uno aut altero amicorum comitatu, adeò ut plerique, quibus magnos viros per ambitionem æstimare mos est, viso adspectoq; Agricolâ, quærerent famam interpretarentur.* Et ad tales non incommodè applicari possit Emblema illud; *Non cernuntur & adsunt.* Nonnunquam fit  
etiam

etiam, ut dotes & merita ejusmodi primorum pretio suo careant, quia defunt, qui ea dignè æstimare velint vel norint. Nec enim quovis seculo justos fui Censores virtus reperit. Luctatur sæpè sub invidiæ tyrannide, sæpè & ignorantiam recti, grandem bonorum virorum remoram, superare non potest. Digno itaque judice destituta, minor, quam est, videtur esse, nec accipit honorem, quem meretur.

## CAPUT IX.

*Stellæ moventur perpetuò, etsi motus earum non semper sit manifestus.*

**S** Tellas perpetuo quodam motu circumagi, ne ii quidem negant, qui cœli alioquin motum inficiantur. Hoc enim stellarum hospitium, (cælum) reverà per se non moveri, sed astra solummodò & corpora cœlestia libere absq; omni impedimento in purissimâ illâ aurâ æthereâ, quâ totum stellarum domicilium est impletum, ferri affirmat suam & aliorum Astronomiæ instauratorum hypothesein secutus amplissimus Hevelius, (Selenograph. pag. 156.) Vir de siderali scientiâ optimè merens. Stellæ cā in re æmulari solent Viri magni. Quiescere nec ipsi solent, sed semper in actu esse. Nec in ullis magis sese exferit agilitas animi humani, natale cælum æmulantis. Ut enim cœlestium natura semper in motu est, quemadmodum Seneca vulgarem secutus sententiam loquitur, fugit & velocissimo cursu agitur; ita mens hominis, præsertim generosioris. Qualem in Theod. Imp. describens Latinus Pacatus: Gaudet profectò, inquit, Divina perpetuò motu, & jugi agita-

*agitatione se vegetat aternitas, & quicquid homines laborem vocamus, vestra natura est. Ut indefessa vertigo cælum rotat: ut maria æstibus inquietata sunt, & stare Sol nescit: ita tu, Imperator, continuatis negotiis & in se quodam orbe redeuntibus semper exercitus es. Istiusmodi animum, segnis otii impatientem, de vestrà etiam, Prælustres Adolescentes, Familiâ non pauci egregii Viri ostendêre. Atque inter alios præcipuè proavus vester Nicolaus Guldensternius, Regni Sveciæ Cancellarius, cujus & cunctam indolem & egregios juventæ labores, tum multiplices per Europam peregrinationes, & postea Legationes ad Cæsarem aliosque magnos Principes susceptas, longum nec pro modo hujus opusculi foret referre. Brevi compendio negotiosissimam Viri magni vitam repræsentat Carmen, quo, ut habet Messenius, (*theatr. Nobil. Svecor. p. 14*) illum ad Stetinensem transactionem olim Legatum salutavit Haslobius: Quod qualecunque est, propter res, quas continet, lubet hîc subjicere.*

*Nicolaus cætum Baro Gyllensternius ornat,*

*Cui Regis Sveci pectora nosse datur.*

*Ardua suscipiens tractanda negotia rerum,*

*Fert humeris magni grande laboris opus.*

*Illius ingenium formavit Sveci: cultu,*

*Cùm studiis ætas mollibus apta fuit.*

*Leucoris Albiacas illum suscepit ad undas,*

*Et gremio fovit dulcia membra suo.*

*Tempore quo multo regnabat laude Melanchthon,*

*Restituens sacris, eloquioq; decus.*

*Et*

*Et tepidas coluit Musas Loranidos Urbis,*  
*Teutona cùm rapuit Martius arma calor.*  
*Gallia te vidit, studio quam Sequana tingit*  
*Vidit & Ausonii mœnia pulchra soli,*  
*Vidit & auriferam, quàm late currit Iberum,*  
*Anglicus & quantum navita mercis habet.*  
*Scotia post varios illi conspecta labores,*  
*Ingeniis hodie Scotia clara, fuit.*  
*Fovit & hospitio Germania sapiùs illum,*  
*Hospitibus certe non aliena suis.*  
*Mittitur Orator, patriæ cùm tecta revisit.*  
*Et potuit magni Cæsaris ore frui.*  
*Anglia Legatum vidit, nec Scotia nescit.*  
*Vidit & Hessorum qui regit arva virum.*  
*Sveciaci factus dum Cancellarius Orbis,*  
*Pro Patriæ curat multa salute suæ.*  
*Jussit Joannes illum Rex esse Baronem,*  
*Premia quæ Virtus tanta laboris habet.*

Sed nobis in stellarum naturâ id porrò dignum  
 consideratu videtur, quod etsi rapidissimo motu fe-  
 rantur sidera, sic ut omnem calculi industriam  
 eludat, propè & fidem superet celeritas, quàm iis  
 Mathematici, & in his Mersennus, Vir doctus &  
 sagax, tribuit: nihilominus vulgi oculis ille motus  
 vix sit observabilis. Unde Lucretius:

*Sidera cessare æthereis adfixa cavernis*  
*Cuncta identur, & assiduo sunt omnia motu:*  
*Quandoquidem longos obitus exorta revisunt.*  
*Cum permensa sua sunt calum corpore claro,*

*Solq; pari ratione manere & Luna videtur*

*In statione, ea quæ ferri res indicat ipsa.*

Et pariter Seneca, lib. IV, de Benefic. c. 13. de stellis ait, quod specie stantis atq; immoti operis velocitatem suam abscondant. Stellas & hæc in re sæpe numero Viri magni imitantur. Tum enim maximè in motu cùm quieti esse videntur. Quemadmodum de se Scipio dicere solebat, *Nunquam minus otiosum esse, quàm cum esset otiosus.* Et hi tales sæpè plus efficiunt aliis fatageis, & nimium inquietis, verumque faciunt, quod Claudianus ait:

*- - - peragit tranquilla potestas.*

*Quod violenta nequit. mandataque fortius urget*

*Imperiosa quies.*

Sed de hæc re paulò ante aliquid dixisse memini.

#### CAPUT X.

*Sidera & constantissimè & ordinatissimè cursus suos conficiunt,*

**S**iderum non perpetuus tantùm, sed simul ordinatissimus motus est: ita ut in admirationem quemque mortalium rapiat illa sub certis adèò legibus decurrens corporum pulcherrimorum agilitas. Nec immeritò Cicero, (de Natur. Deor.) nulla in cælo nec fortuna, nec temeritas, nec erratio, nec vanitas inest: contraq; omnis ordo, ratio, veritas, constantia. Manilius de cursu hoc siderum:

*Non quicquam in tantâ magis est mirabile mole,*

*Quam ratio, & certis quod legibus omnia parent.*

*Nusquam turba nocet, nihil illis partibus errat,*

*Latius & Levius, mutatoque ordine fertur.*



Et nullâ exre certiùs sapientissima Divini Conditoris ac Directoris manus agnosci potest, unde idem Poeta de ordine cœlestium loquens pergit:

*Ac mihi tam præsens ratio nonnulla videtur,*

*Quâ pateat mundum Divino Numine verti.*

Stellas hâc quoque in re imitari solent & debent Viri magni: Ut Vitæ suæ actiones quàm optimè ordinent ac disponant. Certè enim, *nihil est*, ut ait Cicero, *pulchrius in omni ratione vitæ dispositione atq; ordine.* Ordo anima rerum, ut habet vulgare verbum. Nec nimia sunt encomia, quæ Ordini eloquentissimus Nazianzenus tribuit Orat. XXVI. Ordo, inquit, *omnia constituit & alligavit.* Ordo cœlestia & terrestria continet. Ordo in iis, quæ ratione & animo intelliguntur, locum habet. Ordo in iis, quæ sensibus præcipiuntur. Ordo in Angelis; Ordo in astrorum motu, magnitudine, mutuâ relatione & splendore. Ordo cum anni partibus & temporibus apte & distinctè tum progredientibus & recedentibus, ac per mediocritatem mitigantibus asperitatem. Ordo in diei & noctis mensuris & intervallis. Ordo in elementis. Ordo cælum disposuit, aerem porrexit, terram supposuit, aut etiam superposuit, humidam naturam fudit, atq; in unum locum contraxit. Ac Viros quidem in excelsis positos eò magis Ordini servando insistere oportet. quò pluribus distrahi negotiis solent. Alioquin enim minimè omnibus sufficerent, & plurima agerent perperam, famæque adeò suæ, imò & publicarum rerum cursui officerent. Non injuriâ itaque in Aurelio suo hanc ordinis curam deprædicat

dicat Gvevara & post alia multa, *Nunquam*, ait, (c. XVIII.) *rectè & ordine Respublica regetur, nisi rectè & ordine regatur vita Principis.* Et in Sigismundo III. Rege Poloniae ac Sveciae à viris, qui aulam ejus & vitam penitissimè perspexerant, atque inprimis ab Illustr. Parente vestro, inter alia hoc potissimum audiui commendari, quòd ordinatissimè omnia privatim publicèque ageret.

## CAPUT XI.

*Sidera an ab aliquâ animâ intelligente regantur.*

**N**ON videntur stellæ tam benè composito ordine cursus suos emetiri posse, nisi ab aliquâ causâ moverentur, quæ intellectûs sit compos. Aristoteles formam assistantem coelo & stellis tribuit, à quâ regi ac moveri illas putat. Alii vetustissimi Sapientes seu universali spiritu mundi, seu propriâ quâdam & insitâ animâ illas, uti & cœlum, agitari credidère. Prius illud Virgilius videtur affirmare, cum ait:

*Titaniaq; astra  
Spiritus intus alit, totamq; infusa per artus  
Mens agitat molem.*

Alterum Pythagoras. Zeno, Plato, alique Philosophorum plurimi, tum Judæorum etiam sapientes defendère. Quibus non tantum aliqui ex Patribus Christianis accesserunt, sed & magnus Astro-  
nomus Tycho Brahe, cujus eâ de re verba ex Epistolâ ad Rothmannum recitat Vossius de Idololatriâ  
lib.

libII.c. 20, *Verum hoc in cœlestibus cœlesti quodam & longe vivaciore exquisitioreq; modo eveniunt, quàm in animantibus terrestribus, vel æquoreis: cum & cœlum animatum esse, ipsa q; cœlestia corpora animantia quædam cœli, vitali spiritu prædita, non abs re sensisse videtur divina illa Platoniorum Philo, ophia. Mihi item hanc non libet nunc meam facere, cui sufficit, eximium hunc, & à manu sanè divinâ proficiscentem tenorem, quem sidera servant, admirari: tum illud istâ occasione monere. pulcherrimum Virorum in alto agentium decus esse, si à ratione prudentiâque perpetuò regantur. Benè Seneca: *Si vis tibi omnia subicere, subice te rationi: multos reges. si ratio te rexerit.* Et Cicero, *vere ars vivendi est Prudentia, sicut medicina valetudinis, navigationis gubernatio.* Sed inprimis in regimine rerum illa utramque penè paginam facit. Et rectè Menander:*

ἅπαντα δῖλα τῷ Φρονεῖν καθεύ-  
 σαται.

*Subiecta penitus cuncta sunt prudentiæ*

Neque reliqua animi bona sine hâc ullam penè vim habent, & jure virtutum cæterarum Prudentia rectrix ac moderatrix audit. Adde & Fortunæ, si Poetæ credendum, qui ait:

*Nullum numen abest, si sit Prudentia, sed te*

*Nos facimus, fortuna, Deam, cœlog, locamus.*

Sed qui rectè sapiunt, prudentiæ ita omnia subji-  
 ciunt, ut ipsam Deo: sine quo prudentissimi quique  
 desipiunt, & omnis humana Sapientia vanescit.

## CAPUT XII.

*Stella agunt in res inferiores.*

**S**idera cùm in sublimi versentur, vim tamen suam ad res infimas demittunt : & cum pleraque mole suâ longissimè terram superent, terræ tamen ministrant, ejusque sese usibus impendunt. Certè magna eorum in res sublunares omnes efficacia ac potentia est. Ab iis enim aër plurimum alteratur, & vires suas annus habet. Tempestates cieri ab Ori- one, Arcturo, Coronâ, ventos à Capra & Hoedis, pluviam ab Hyadibus & Plejadibus, æstum à Caniculis & anterioribus partibus Leonis, vulgaris alioquin observatio est. Inde autem animantia omnia non leviter afficiuntur. Nec ad Lunam tantùm, sed ad cæteras etiam stellas quodammodo pertinet, quod Cicero perhibet, *Multa, inquit, à Lunâ manant & fluunt, quibus animantes alantur, augescantq; & pubescant, maturitatemq; assequantur, quæ oriuntur à terrâ.*

In ipsam denique voluntatem humanam aliquantum licere sideribus multi existimant : eò quod à corpore non parum trahat animus, corpori autem multam subinde vim imprimant stellarum defluvia. Ac inclinationem quidem mentium ab astris fieri posse, Ptolomæo & aliis mathematicis facilè largimur, attamen talem, quæ menti seu rationi humanæ assistente DEO, sit superabilis ; Sicq; verum manet illud : — *Sapiens dominabitur astris.*

Cæterum quæ vis siderum in corpora inferiora, et virorum Principum est in cæteros homines. Nam

ferè, prout illi in alto rem moderantur, exinde isti felices vel infelices, penè etiam dixeram, boni vel mali. Quia sanè & in mores vulgi multum potest vita & exemplum regentium. Uti enim rectè facere suos faciendo docent, ita & vitia transfundere in eosdem possunt, plusq; exemplo, quàm peccato nocent. Mores denique sequi amat fortuna populi: quanquam citra hos quoq; multum eam variare possunt Dominantes. Ab illis plerumque pax publica, vel bellum, legum cura vel neglectus.

— — Procerum motus hæc cuncta sequuntur,

*Humanum paucis vivit genus.*

Pulcherrima autem laus illorum est, si potentiam suam non nisi eâ parte ostendant, quâ possunt prodesse. Neq; ulla, ut Panegyristes ait ad Theodosium, major felicitas, quam fecisse felicem, & intercesse inopiam, & fortunam vicisse, & dedisse homini novum fatum. Cui respondet illud Poëtæ:

*Consulere paucis, parcere afflictis, ferâ*

*Cedere abstinere, tempus atq; iræ dare,*

*Orbi quietem, seculo pacem suo,*

*Hæc summa virtus: petitur hæc cælum via.*

### CAPUT XIII.

*Monstrant Regibus astra viam.*

Cum multis modis benè merentur de genere humano stellæ, tum eo quoque, quod & temporum, & suo modo etiam locorum indices, adeoq; actionum plerarumque duces & directrices sunt homini.



mini. Navigantes utique ad earum ductum in vastissimo mari cursum suum moderantur. Præcipuè in oculis illi habent Ursam minorem. Quâ, cum ex magnis Principibus unus loco Symboli utatur, lemma ei inscripsimus, *Motum immota rego*. Sed & extra ordinem nonnunquam earum ministerio ad dirigendas hominum vias & actiones Deus utitur; quemadmodum Magis ad præsepe Servatoris ducem stellam esse voluit. Et eò alludit lemma, quod capiti huic præfixum est, à Joanne Gallorum Rege transumptum, qui id Stellatorum Equitum ordini olim attribuit. Unde hi stellam, aureos radios jaculantem, in galeri ornamento, cum dicto lemmate ferebant. Haud dubiè sic divinæ providentiæ gubernatio indigitabatur, quâ Principum actiones ita reguntur, ut olim stella Magorum iter direxerat. Mihi idem lemma non ineptè, nec sine veniâ, aliò deflecti posse videtur. Ut nimirum eam magnorum Virorum Virtutem significet, quæ Regum atque Imperatorum negotia dirigit consilio; Virtutem utique præclaram ac prorsus divinam. Nec enim temerè Aristoteles ad Alexandrum M. olim,

τὸ βουλευέσθαι τῶν περὶ τῶν ἀνθρώπων θεϊκώτατόν ἐστι.

*Consu'ere, eorum quæ circa homines, divinisimum est.*

Necessaria eadem & salutaris est, Magni etiam Re-

gistestimonio, qui ait: *Salus ibi, ubi multa consilia,* intellige bona. Quippe sine consilio non privatae, tantò minus publicae & Principum res consistere possunt. *Multa cura summo Imperio inest, multi ingentes labores,* ut ait Sallustius; nec sufficere magnitudini & varietati negotiorum unius hominis, quantumcunque sapiat, animus potest, quanto minùs, si non sapiat. Itaque opus omninò est Imperiorum gubernatoribus ejusmodi ministris, qui nauticae instar acùs, in vasto illo negotiorum mari viam illis monstrent & ut remigum moderatores, navent Dominiis ais operam. Sine his enim ad scopulos inevitabiles fortunam suam & rem publicam allident. Neq; malè huc applicuerimus Claudiani hos versus:

*Sic vacui Rectoris equi, sic orba magistro  
Feritur in abruptum casu, non sidere, puppis.  
Sic ruit in rupes amisso pisce sodali  
Bellua sulcandas cui praevis edocet undas,  
Immensumq; pecus parvae moderamine caudae  
Temperat, & tanto conjungit fœdera rostro.  
Illa natat rationis inops, & caeca profundi  
Jam brevibus deprênsa vadis, ignara reverti  
Palpitat, & vanos scopulis illidit hiatus.*

Pulchre etiam in hanc rem illustri Sauedra in symbolis, Princeps, inquit, cui tam multa videnda sunt, totus deberet esse oculus, totus auris. Quod quia fieri non potest, alienis utatur, ne esse est. Ac proinde idem Consiliarios oculo ibidem comparat, Aristotelem secutus:

sceptrumque oculatum idem vir magnus in Emblemate figurat cum inscriptione:

*His prævide & provide.*

#### CAPUT XIV.

*Astra lucent Orbi, nec consumuntur.*

**L**umen Orbi sublunari perpetuum sidera fundunt, sed sine damno suo. Inexhaustum quippe in se exprimi conditoris munificentia fontem lucis habent, ut quantumcunque radios suos dispergant, nihil tamen sentiant decedere. Stellas eâ quidem in re imitari non possunt Magnates Viri, quia & ipsos, & omnem eorum fortunam, omnes opes, fragilitati & corruptioni supremum Numen obnoxias esse voluit. Interim qui animum attendunt, ex siderum perenni velut liberalitate hoc possunt discere; benefacere equidem Magnis Viris æquè competere, quàm stellis lucere: Sed eum tamen quoque servandum in beneficiis modum, ne ipsi beneficia immodicè spargendo consumantur. Rivulos de fontibus suis deducere, & longè lateque diffundere non licet tantum, sed & decet: at sic tamen, ne fontes quoque ipsi inarescant. Pulcherrima Virtutum Beneficentia est, sed nolumus eam nepotari. Et mera ambitio, jactantia, effusio, & quidvis potius, quàm liberalitas existimanda est, cui ratio non constat, ut ait in panegyri. Plinius. Egregiè etiam ornat Viros in excelsis agentes vitæ splendor, atque exinde id illi obtinent, ut jure appellen-

tur Magnifici. Interim huic quoque Virtuti, eximiæ fanè & generosissimam quamque indolem maximè decenti, affines sunt scopuli & præcipitia. Si enim extra fines evagetur Magnificus, in luxum, & exinde in egestatem & contemptum denique incidet. Stellas quoque lumini jugiter ita spargendo non suffecturas credidère veteres quidam, nisi & ipsæ alerentur. Igitur pascieas humore terreno & ipso inprimis Oceano, Cicero, Plinius, & omnes Stoici, ut tradit Lipsius in Physiologiâ, senserunt, ex quorum sensu Lucanus :

*Necnon Oceano pasci Phœbumq; polumq;  
Credimus. — —*

Neque dissentire videtur S. Ambrosius. *Frequenter, inquit, solem v-demus madidum & vorantem, in quo evidens dat indicium, quod alimentum aquarum ad temperiem sibi sumpsit.* Verùm alii plerique, præsertim hodierni philosophi, ut cœlum, sic sidera nullo ejusmodi pabulo indigere arbitrantur, cùm sint corpora simplicissima, ab omni elementari contagione libera, immutationis corruptionisque expertia. Alii autem ea solent corpora, quæ ex materiâ conflata, ejus subinde aliquid deperdunt, quod deinde alimento reparandum sit. Interim quin siderum aliqua vapores humiditatesque è terra & aquis eliciant, negari non potest. Nimis id enim manifestum est, præsertim de Sole. Verùm non sibi, nec suum in commodum id, quicquid est, stellæ attrahunt, sed nempe in usum alienum, inprimis hominis.

Nam

Nam quicquid evocatur humidi, id plerumque in imbrem, rorem, nivem, pruina, aut alia ejusmodi solet converti. Id quod nobis iterum in mentem revocat Heroum indolem, quam ante diximus ita comparatam esse, ut publicam utilitatem maximè omnium quærat, suarum rerum minus curiosa. Nichil quippe vehementius appetunt magni viri, quàm ut verè publici Patres dici queant, adeoque in se verum efficiant, quod Poëta præcipit:

*Tu civem patremq<sub>3</sub> geras, tu consule cunctis,  
Non tibi, nec tua te moveant, sed publica vota.*

## CAPUT XV.

*Inter Stellæ Libra est, index Justitiæ  
astrum.*

**D**Uodecim signa sunt, quæ magnum mundi luminare pervadit, dum orbem suum cursu annuo emetitur. In iis sibi vicina duo sunt, quæ inter mitissima & maximè salutaria habentur, Virgo & Libra: Illa olim, vigente inter homines innocentia, præses ac custos justitiae & æqui fuisse, postea præpollente scelerum dominatu, in cælum translata fingitur. Libræ spatia cum ingreditur Sol, fit dici & noctis, caloris & frigoris quasi æquilibrium; prorsusque tum magnus ille siderum Rex justitiæ solium videtur conscendere, & pari quasi lance bona sua dimetiri hominibus. Utrumque sidus *justitiam & æquitatem*, nobis insinuat, in magnis Capitis pulcherrimè radiantem gemmam. Non im-



merito *Virtutem excellentissimam & splendidissimam, omniumque virtutum Reginam ac Dominam* dixit Romanæ eloquentiæ parens. Et verè principum virorum virtus illa est, unde & in sacro populo, antequam unius dominatio malâ libidine populi invehetur, qui rebus præerant, Judices primo dicti sunt, quasi qui jus dicerent, hoc est, justitiam administrarent unicuique. Et divinus Plato, teste Macrobio, in omni sermone suo de Reip. institutione proposito, infundendum animis Justitiæ amorem suadet, sine quâ non solum Respublica, sed nec exiguus hominum cætus, nec domus quidem parva constabit. Reges ipsos fruendæ justitiæ causa olim constitutos esse, idem, quem paulò antè laudabam, Cicero ait; idemque affirmat Hesiodus, magnus ubique justitiæ præco. Totus enim liber Operum & Dierum, plenus est adhortationum, quibus Perses ad justitiam stimulatur. Principibus verò, ut aliis in negotiis, ita in juris exercitio ministrant Viri primores. Neque enim dijudicandis tot hominum litigiis ac controversiis ipsi supremi Rectores sufficerent. Quanquam aliàs laudi datur Augusto, à Svetonio; quod ipse jus dixerit assidue & in noctem nonnunquam: si parum corpore valeret, lecticâ pro tribunali collocatâ, vel etiam domi cubans. Pariter Tiberius & Vespasianus judiciis soliti sunt assidere. In Trajano quoque idem laudat Plinius panegyristes. In justitiâ autem administrandâ illud maxime & Principes, & qui iis proximi sunt, observandum sibi existiment, ut omnibus ex æquo suum tribuant,

buant, idque citra gratiam & odium, inprimis etiam citra turpe pecuniæ aucupium. Quod Virtutis istius officium, ut & alia pleraque ejus munia, ingenioso Ignatii Albani, Poëtæ Itali, carmine continentur, quod hîc adjici meretur. Ita autem habet:

*Quæ DEÆ? Justitia. Et cur torvo lumine? flecti*  
*Nescia sum lachrymis, nec prece, nec pretio.*  
*Quod genus? à superis: genitor quis? Juppiter: ex quâ*  
*Matre? fide, Nutrix quæ tua? pauperies.*  
*Quis gremio infantem fovit? Prudentia. quonam*  
*Freta duce agnoscis crimina? Judicio.*  
*Cur gladium tua dextra gerit, cur læva bilancem?*  
*Ponderat hæc causas, percutit illa reos.*  
*Cur rari assistunt? quod copia rara bonorum est:*  
*Quæ comes assidua est? candida simplicitas.*  
*Aurium aperta tibi cur altera, & altera clausa est?*  
*Hæc surda injustis, panditur illa bonis.*  
*Paupere cur semper culta? Justissimus esse*  
*Qui cupit, exiguas semper habebit opes.*

Sed lubet ejusdem Autoris alteram imaginem adjicere, quâ iniquitatem, inimicam justitiæ depingit:

*Quæ tu? Injustitia: & cur blando lumine? flector*  
*Protenus ante omnes non prece, sed pretio.*  
*Quod genus; à terris; quo patre? dolo; undecreata?*  
*Ex spe. Quæ nutrix? aurea materies.*  
*Quis gremio infantem te fovit? Opinio famæ:*  
*Quomodo cognoscis crimina? muneribus.*

*Cur gladium dextrâ gestas, lancemq; sinistrâ?*

*Hæc peragit causam divitis, illa inopis.*

*Quid multi assistunt? citat hic, tenet hic, ligat alter.*

*Quæ comes? argenti non satianda sitis.*

*Altera clausa tibi cur auris? & altera aperta est?*

*Hæc patet injustis, clauditur illa bonis.*

*Divite cur habitu? semper manus aggregat aurum,*

*Si nequit, unde velit, surripit, unde potest.*

### CAPUT XVI.

*Inter easdem Stellæ Mars est.*

**N**ullorum Siderum major in res sublunares vis est, quam Planetarum. Qui à perpetuo motu nomen habent, & qui locum quidem, sed certissimis ac definitis spatiis mutant, erronei dicuntur, nisi nunquam errent. In iis non postremum locum tenet Mars, sidus calidum, & colore rutilo sanguinem spirare visum, certè, ut ex effectis apparet, ad ferociam inclinans. Unde & terris septentrioni subjectis, Scythiæ inprimis & Germaniæ præesse olim creditus est. Et certè nullæ propè gentes Martio robore magis eminere; clariores tamen futuræ, si feroces corporis & animi impetus ratione & prudentiâ majore temperavissent. Neque enim per se quicquam nisi pugnas, tumultus, & maxima quæque mala cire Mars solet. At ubi alio aliquo benigniori sidere mitigatur ejus ferocia, nobiles sane effectus edere amat, & veræ fortitudinis bellicæ gloriam sequi & assequi consuevit: Virtutis

tis utique inter Heroicas & magnorum Virorum proprias, haud postremæ ; præsertim si in probum incidat campum, in quo explicare signa sua possit. Hunc verò bellum ei aperit, res equidem funesta & tristis, ea tamen in mortalium indole habens femina, ut nunquam illà cariturum sit humanum genus. Fuerit sanè, si fabulis fides est, illa olim sub Saturno morum integritas, eaque placiditas animorum, ut nemo alteri vi vel fraude nocuerit, sed sponte suâ omnes suum cuique reddiderint reliquerintque. Si enim tale unquam seculum fuit, nullum utique in eo locum regimen Justitiæ permisit Marti ; & viguit illa in orbe beatitudo, quam Ovidius describit, cum ait :

*Nondum præcipites cingebant oppida fossæ,  
Non tuba directi, non ævis cornua flexi,  
Non galeæ, non ensis erat : sine militis usu  
Mollia securæ peragebant otia gentes.*

Quia scil. sub justitiæ sceptro nullum erat pretium fortitudinis. Sed ejusmodi mundi felicitas nunquam, opinor, extitit, nisi intra Poetarum ingenia. Nam certè, penè simul cum ipso genere humano coepère dissidia, lites, pugnæ, tandemque etiam, cum in aliquam multitudinem idem illud excrevit, bella. Nec ipsa Christi sanctissima ac mitissima disciplina ita omnium hominum animos permulsit mitigavitque, quin bellis relictus sit locus, præsertim ex quo illa ad clavum imperii pervenit. Semper reperti sunt, qui privatam, qui publicam quietem

tem vi & armis lacefferent, unde & qui pacis alioquin amantissimi effent, tuendi fui causâ, arma pariter coacti sunt movere. Eademq; necessitas hodie quoque multis incumbit, etsi bellum minimè quarentibus. Sed quia per alios quietis esse non licet, vim alienam pio justoque bello propulsant, & subinde DEO & Virtute Duce, hostes suos vincunt, aliquando & subigunt sibi. Quâ ex re, ut honor denique summus & egregia laurearum triumphorumque materies efflorescit, ita fortunarum, ditionum, Imperiorumque maxima emergunt incrementa.

## CAPUT XVII.

*Stellarum etiam fœdera quædam sunt.*

**H**Abent astra singula corpus & Orbem separatim, habent & tramitem proprium, quem tenent. Sed non ita tamen solitaria semper & aliorum quasi incuria incedunt, quin mutuò sese respiciant, ac societate etiam aliquâ inter se devinciantur. Benè Manilius :

— — *propriis inter se legibus astra  
Conveniunt, & certa gerunt commercia rerum.*

& ibidem:

*Sed DEUS in leges mundum cum conderet omnem,  
Junxit amicitias horum (siderum) sub fœdere certo.*  
Unde in scriptis Mathematicorum toties de planetarum conjunctionibus legere est. Et his ipsis maxime plerumque rerum sublunarium mutationes tribui



bui solent. Soli enim Saturnus si jungatur, aerem reddere putatur torpidum. Si Martis cum Venere fiat copula, imbres & nonnunquam fulmina sequuntur. Juppiter cum Mercurio sociatus ventorum prælia & tempestates excitare dicitur. Jam magnæ illæ Saturni & Jovis conjunctiones cum accidunt, quod equidem vix septimo quoque seculo fieri ajunt, tum memorabiles inprimis rerum periodos in orbe fieri observatum est. Qua de re Chronologi consuli possunt. Nobis jam istæ siderum consociationes amicitiam insinuant, à qua magni viri non solent esse alieni. Est quippe illa vitæ præsidium solatiumque, cujusvis fortunæ hominibus necessarium. Et verè Cicero, *non igni, ait, non aquâ pluribus locis utimur, quàm amicitia*: Eidemque Solem *de mundo tollere videntur, qui amicitiam tollunt de vitâ*. Nec fastigium ullum tantum est, quod isto tibicine non indigeat. Regum ipsorum atque adeò imperii *nul lum melius instrumentum, quàm boni amici*, ait ille apud Tacitum. Et Salustius, *non exercitus neque thesauri præsidia Regni sunt, verùm amici*. Nec temerè Philippus II. Hispaniarum Rex inter adamata symbola habuit malum granatum, quod hians, grana, quæ in eo poma innumera insunt, ostenderet, cum inscripto lemmate, *Tot Zopyros*. Optans scilicet sibi & totidem amicos, quod in malo granato essent; & tam fidos, quàm olim Dario Zopyrus fuerat, quem notum est, corpore ultrò mutilato, Babylonem urbem in Regis sui potestatem rede gisse. Hercum  
porro

porrò veterum res cum evolvimus, eos penè omnes habuisse legimus fidos ejusmodi vitæ ac laborum suorum socios. Herculi Philocteten, Achilli Patroclum, Theseo Pirithoum, Peleo Phænicem, Diomedæ Sthenelum, Æneæ Achaten intimâ necessitudine & individuo periculorum ærumnarumque consortio innexum fuisse tradunt Poëtæ. Moyfi olim Aaron & Josua, Davidi Regi Joabus; Cyro Sybæres, Alexandro M. Parmenio, Scipioni Africano Lælius, Georgio Castrioto, qui Scanderbegus aliàs dicebatur, Moyfès quidam Golentus consors ac comes expeditionum bellicarum fuit. Non unâ verò ex causa aut occasione nascuntur ejusmodi amicitiarum fœdera. Sæpè enim adolescentiæ simul actæ suavitas, nonnunquam variorum casuum ac fortunæ communicio, plerumque verò morum similitudo conjungit animos. Arcetissimè autem iidem amicitiarum nodi coeunt, cum quadam quasi *οὐρανεία* naturali ac coelitus insitâ animorum inclinatione copulantur. Neque enim de nihilo est, quod de vi astrorum in sociandis animorum affectibus tradunt Astronomi, atque inter alios Manilius, qui in libro II. hac in re valde prolixus est. Maximam verò is ad rem istam Trigono vim tribuit, cum ait:

*Longior in spatium porrecta est linea majus,  
Quæ tribus emensis signis facit astra trigonum.  
Hæc ad amicitias, imitantes jura gradumq;  
Sanguinis, atq; animis hærentia pectora ducit.*

Et mox:

*Hæc*

*Hæc meliora putant, mentes quæ jungere possunt,  
Quàm quod nonnunquam fœdus sub sanguine fallit.*

## CAPUT XVIII.

*Stellarum pariter oppositiones sunt.*

**U**Ti siderum societates & amicitias, ita in iis aliqua quasi dissidia, certè effecta eorum contraria sæpè esse, experientiâ docemur. Dicere ex Manilio verbis aliquantum mutatis liceat:

*Sideribus sæpè est adversus sidera bellum,  
Et quasi seditio cælum tenet.*

Nescio an à sideribus proveniant, sed plerumque viros magnos graves persequuntur inimici. Nonnunquam potentiorum odiis obnoxii sunt; id quod tum præcipuè fit, ubi in principes virtuti insensos incidunt. Nam hi gloriam alienam in diminutionem sui accipiunt, & ægrè superari se ferunt ab iis, quos fortunâ supereminent. Ita Davidem Saulus, ita Germanicum Tiberius, Corbulonem Nero, Agricola Domitianus oderat, ob indolem erectiorem, & pulcherrimorum facinorum laudem. Cum paribus quoque non raro magnos viros committit æmulatio, acri quandoque certamine, non usquequaque tamen improbo, dum in Invidiam non degenerat affectus. Hæc enim omnis boni moris, omnis fastigii & felicitatis hostis est. Illa olim Herculem, Theseum, Miltiaden, Themistoclen, Aristiden, Epaminondam, Africanum exercuit presitque. Illa Belisarium (lubet enim ex Christianorum Principum histo-

historiâ vel unum hunc producere) ex summâ fortunâ in carcerem detruxit. Is vir rebus adversum Gothos & Vandalos egregie gestis, mirificam sibi apud omnes auctoritatem, apud Justinianum verò gratiam pepererat, adeò, ut hic monetam cudi curaverit argenteam, cujus alterum latus Justiniani impressam imaginem, alterum Belisarii faciem representabat, cum inscriptione : *Belisarius decus Romanorum*. Sed eundem paulò post affectati imperii suspitione cæterorum procerum invidia adsperfit, cumque fidem ea apud Principem credulum reperisset, in vincula compulit. Ut ita inclusus Vir de Imperio optimè meritus, aliquamdiu luce publica caruerit. Quod ulterius extendentes quidam scriptorum, oculis orbatum Belisarium, & stipem mendicasse memorant. Sed non procescit viri calamitas ultra carceris tenebras : & ex his ipsis quoque anno sequenti liberatus, dignitæque & fortunæ suis redditus, de invidiâ & inimicis suis splendidissimè triumphavit. Ac tali sæpè exitu solent evanescere fumi invidiæ. Tantoque adeò minus extimescenda est ista pestis viris egregiis, & suâ virtute nitentibus. Excitare eam, & excitatam ferre posse, eximiæ utrumque virtutis & gloriæ est. Et si furere illa nimium ac gravis futura videatur, aptis nonnunquam delinimentis demulceri potest, quorum aliqua Aulicus inculpatus brevi iterùm edendus, tum Picartus in Observationibus suis Politicis (*Decad, XII. cap. 8.*) annotavit, & plura cuique

Optimati sua suppeditare potest prudentia. Quod si nulla prorsus offa isti Cani os obstruere possit, latrare eam patiuntur Viri magni, suo interim innocentiae clypeo tuti, & à conscientia solatium, à tempore ipso remedium quærentes. Nam hoc denique malam istam bestiam necare solet. Cum obstinatissima ea est, ad ipsum usque sepulchrum, quos odit, deducit, ibidemque ipsa quoque expirat tandem. Postea verò demùm posteritas, optima plerumq; meritorum æstimatrix, suum cuique decus rependit, demptisq; obtreñtatoribus ipsa se virtus magis magisq; extollit, ut ad Cæsarem Salustius ait.

## CAPUT XIX.

*Stellæ non sunt munda coram DEO ex Jobo :  
ubi & de Solis maculis.*

**R**Es omnes creatas etiam fulgidissimas, ad Sapientiam DEI comparatas, meras tenebras esse affirmat Baldadus Jobi amicus, & nec Lunam coram eâ splendere, nec ceteras stellas in conspectu DEI mundas esse, ait. Nihil alioquin pulchrius, nihil splendidius est sideribus. In rebus utique sublunaribus nihil æquat puritatem eorum. Sed nempe, quæ perfectione excedere res alias videntur, superantur tamen Divinæ virtutis excellentiâ, & in pulcherrimis quibusq; rebus, imperfectionis nævos, nobis inconspicuos, cognitos habet DEI conditoris oculus. Quid quod & hominum hodiè solertia visa sibi est reperisse, unde & cælum & stellas, corpora aliàs ex



Aristotelis sensu omnis corruptionis expertia, imbecillitatis possit convincere? Hevelius sanè vir nobis amicissimus idemq; sagacitate in cœlestibus clarissimus, plurimis alterationibus cœlum obnoxiū statuit, ac toto Selenographiæ libro, hoc inter præcipua agit, ut Solis & Lunæ maculas ostendat Orbi. Et ejusdem cum eo sententiæ sunt Galilæus, Gassendus, Bullialdus, Eichstadius, aliiq; magni nominis Mathematici. Jam mutilas quoq; stellas nonnullas jamdudum antiqui aliqui observaverunt, ex quibus Manilius:

*Quod si solerti circumspicis omnia curâ,  
Fraudata invenies amissis sidera membris.  
Scorpius in Librâ consumit brachia. Taurus  
Succidit incurvo claudus pede. Lumina cancro  
De sunt. Centauro super est & queritur unum.*

Et inde idem Poëta elicit proponitq; monitum, quod mihi in hoc capite pro scopo est. Ita autem ille:

*Sic nostros casus solatur mundus in astris,  
Exemploq; docet patienter damna subire:  
Omnis cum cœlo fortunæ pendeat Ordo,  
Ipsaq; debilibus formentur sidera membris.*

Nempe à Stellarum imperfectione & quadam velut debilitate solatur Poëta genus humanum; & defectus mortalitatis non tantum minus mirandos, sed & tanto ferendos patientius existimat, quando ab iis cœlum quoq; ipsum non prorsus sit immune. Caterum defectus illi partim in fortunis hominum, etiam magnorum, partim in moribus cernuntur.

In

In fortunis, cum varii subinde castis adversi, vel summis quibusque viris contingant, quibus aut opes eorum, aut dignitates atteruntur. Neque enim ulla vitæ statio tam alta, tam splendida est, ut aleam mutationum & vim fortunæ transcendat. Quinimò quò sublimior cujusque hominis conditio, quò opum honorumque major affluentia, hoc magis ea ictibus fati exposita est, prout corpora, quantò grandiora sunt, tantò magis patent in vulnera. Imò & ea veluti lex posita est rebus mortalium, ut, ubi ad summum perductæ fuerint, retrò ferantur, partim dispositu factorum, varia plerumque instrumenta immittentium, quibus impellatur is, qui ad ruinam est damnatus. Verùm hîc non tantùm de fortunæ defectibus res nobis est, sed simul quoque, & penè etiam principalius, de morum maculis. A quibus nullius unquam hominis vita prorsus est immunis. Et verè in Panegyrico Plinius: *Nemo adhuc extitit, cujus virtutes nullo vitiorum confinio lederentur.* Et Seneca: (*Epistola 114.*) *Nullum sine veniâ placuit ingenium. Da mihi, quemcunq; vis, magni nominis Virum. Dicam, quid illi ætas sua ignoverit, quid in illo sciens dissimulaverit. Multos dabo, quibus vitia non nocuerint, quosdam, quibus profuerint.* Adeoque igitur etiam ii imperfecti sunt, qui boni aliàs videntur: & quos nullum notabile vitium inquinat, iis virtutes tamen aliquæ desunt. Rarissimus utique Princeps, imò forsitan nullus est, qui perpetuo & toto virtutum quasi orbe luceat. Bene Claudianus:

— — *Bellis insignior ille,  
Sed pacem fœdat vitiis: in publica felix,  
Sed privata minus. Partitim singula quemq̃  
Nobilizant.*

Quod idem quoque Plinius dicit in Panegyrico:  
*Enituit aliquis in bello, sed obsolebit in pace, alium toga, sed non & arma honestarunt: reverentiam ille terrore, alius amore humanitate captavit: ille quæsitam domi gloriam in publico, hic in publico partem domi perdidit.* Verum enim verò, cum mortalium unusquisq̃, aliquid sibi deesse intelligit, tantò magis agnoscere mortalitatis suæ imbecillitatem, tantò & fortiùs pugnare quotidie in vitium, & ad perfectionem, si quæ datur in vitâ, tendere quivis tenetur. Tanto etiam qui potentes sunt, æquiores placidioresque se præbere aliorum nævis debent, ne acri nimis rigidi juris severitate quævis delicta persequantur; potiùs verò hâc quoque in re ad illud culmen virtutis enitantur, de quo idem Plinius loquitur in Epistolâ quadam: *Optimus atq̃ emendatissimus ille est, qui cæteris ita ignoscit, tanquam ipse quotidie peccet; ita peccatis abstinet, tanquam nemini ignoscat.*

## CAPUT XX.

*Stella cum cadere videntur, mala aliqua portentunt, uti & Eclipses.*

**D**E Stellis cadentibus magnus jam olim inter rerum naturalium scrutatores fuit dissensus. Epicurus revera stellas de cœlo labi credidit,

& nu-

& nubibus immerfas, pugnâ quadam caloris cum humido excitare fragorem, qui fulgura & fulmina comitari soleat. Aristoteles de stellarum istarum trajectione, quam *διαδοκμήν* & alibi *εἰς αἴθερα* vocat, inter meteora agit. Et in horum censum phœnomena illa à plerisq; hodie philosophantium referuntur. Interim eadem, apud omnes, stellarum adhuc nomen retinent, & cadentibus illis decidere dicuntur stellæ, non quod verè cadant, sed quia cadere videantur, cum aliud quid profiliat, quod stellæ figuram mentiens, vulgi oculos decipit. Ex cuius vulgi mente Virgilius quoque loquitur, cum ait :

*Sæpè etiam stellas, vento impendente, videbis  
Præcípites cælo labi, noctisq; per umbram  
Flammarum longos à tergo albescere tractûs.*

Sed quicquid tandem sit, quod decedit, nunquam fit ille casus citra singularem, eumque lævum plerumque effectum. Ac primum ventorum tumultus eò portendi asseverat Plinius: *fieri, inquit, videntur discursus stellarum, nunquam temerè, ut non ex eâ parte truces venti cooriantur.* Eodem facit, quod Seneca ait: *Argumentum tempestatis Nautæ putant, cum multæ transvolant stellæ.* Ptolomæus non tantùm ventos & aëris perturbationes, sed & siccitatem, & deniq; exercituum incursiones illa stellarum trajectione, indicari asserit. Et inter belli civilis, quod Pompejus cum Cæsare gesfit, præsagia, memorat Lucanus,

— — — *cæloq; volantes**Obliquas per inane faces.* — —

Jam ipse quoque Servator extremæ rerum in orbe confusione prævium stellarum de cælo delapsus affert. Id num propriè an improprie accipiendum sit, non est meum definire. Video tamen aliquos auctores per stellas eo loco Viros magnos, in Ecclesiâ imprimis eminentes, intelligere. Mihi, qui totâ hac dissertatione viros magnos stellis comparavi, satis est nunc dixisse, virorum excellentium occasum nihil boni plerumque Rebus publicis & Imperiis portendere; perinde ut phænomena illa, quæ stellæ cadentes dici consuevêre, calamitates aliquas præcedere & signare solent. Certè enim, ubi terram quampiam affligere decrevit Numen, optimos quosque inde auferre amat. Nam cum apprimè & præcæteris diligit istos, expertes esse vult malorum imminentium, adeoq; in portum eos subducere solet, antequam oriatur tempestas, quæ cunctis naufragium minatur. Deinde, si ad pœnam divinam matura est Urbs vel Respublica, adimit illi Nemesis viros insignes, ceu remoras fatorum. Sæpè enim viri ejusmodi iræ divinæ & suppliciorum destinatorum cursum, probitate suâ sufflaminant. Nonnunquam prudentiâ atque autoritate, nutantem consiliorum negotiorumque structuram sustentantes, morantur ruinam publicam. Quam ubi inducere jam statutum est fato, subtrahi necesse est fulcra & tibicines, quibus id, quod ruit, ante hac innitebatur.

Sed

Sed jam de Eclipsibus ob affinitatem argumenti breviter aliquid addendum est. Quibus non Solem tantum & Lunam, sed & Jovis & Mercurii & Veneris stellam obnoxiam, posteriorum Mathematicorum observavit industria. Sed Solis & Lunæ, utpote siderum in res humanas maximè agentium, deliquia præ cæteris movere solent animos. Et jam olim viros etiam præstantissimos, ac supra vulgum sapientes, in talibus stellarum defectibus, si insignes & diuturni sint, scelera magna & mortes memorabiles metuisse, ex Plinio colligere est. Idemque Nicias, Atheniensium Imperatorem, cum obtenebratione ejusmodi factâ, educere exercitum noluisse, suæ Reipubl. multum nocuisse narrat. Contra autem deliquium Lunæ Germanico Cæsari ad compescendos milites seditiosos multum profuit, ut apud Tacitum legi potest. Sed etiam illud obiter tangendum est, quod maxima sidera curam mortalium, tum potissimum, cum deficiunt, in se avertunt. Benè Seneca; *Sol spectatorem non habet, nisi cum deficit, & nemo Lunam observat, nisi laborantem.* Unde & nobilis ille orator ac historicus Famianus Strada occasionem sumsit Emblematis, quo Soli deficienti lemma inscribit: *Spektatur, cum deficit*: Idq; ad Christum refert, invitantem ad se trahentemque mortales, cum morte acerbissimâ deficeret: sed trahi idem ad homines quoque magnos posuit, quos plerumq; tum demum æstimare ætas sua solet, cum habere illos desit. Et nempè quod de Patriâ dicit Cicero,



id de Virtute quoque verum est, *quod eam cavendo magis, quàm fruendo intelligant homines.*

## CAPUT XXI.

*Stellarum fulgorem mentiuntur meteora quedam, ut Cometa & ignes fatui.*

**C**orporum cœlestium naturam pernoscere opus arduum, nec cujusvis ingenii est. Vulgi sanè oculos plerumque ea fallit, sed & solertissimorum quorumque aciem, etiam diu fatigatam, sæpè effugit. Unde stellarum specie multis imposuere corpora, quæ nihil minus sunt, quàm stellæ. Cometas utique à Veterum nonnullis, nimirum Anaxagora, Democrito, Pythagoræ item discipulis, ad stellas relatos esse, Aristoteles testatur: & ideò eodè n inter DEos quoque locum & honorem in delirâ gentium superstitione habuisse notat Vossius. (*de idolat. l. III. 9.*) Inter stellas quoque numeratiC stor & Pollux, unde apud Horatium;

*Fratres Helena, lucida sidera.*

Et magno honore culta hæc olim scimus, inprimis à navigantibus, qui se eorum conspectu adjuvari credidè in tempestatibus. At hodiè apud naturalis scientiæ consultos constat, Castorem & Pollucem nil nisi exhalationes esse pingves, & viscosas. Nihil jam dicam de aliis meteoris igneis, quæ pariter flammâ suâ imperitis nonnunquam fucum faciunt, ut pro sideribus habeantur. Mihi nunc, quod de larvis siderum dixi, applicandum est ad virorum eminen-

minentium historiam. Nam & inter istos non raro imposturæ occurrunt. Quippe virtutis larvam nimis sæpè flagitia induunt, & nescio, quo iudiciorum errore, viri magni non rarò dicuntur, qui dici minimè meruère. Reperti quoque identidem, qui magis felicitate quâdam, quàm bonis artibus arrepsère summis Principibus, & hîc gratia atque autoritate validi, honores maximos præripuère aliis, qui is longè fuerant digniores. Quoties porrò factum est, ut homines vili de sanguine nati, magni generis jactarent splendorem ?

Plenæ sunt historiæ fraudatorum ejusmodi, qui specie oris, qui dictis compositis, artibusque subdolis principum virorum nomina & auctoritatem sibi arrogantes, non uni & alteri homini, sed magnæ multitudini, nonnunquam & totis pene gentibus palpum obtrusère. Reipubl: Romanæ olim Equitius imposuit, qui Tiberii Grachi filium se fingens, magno populi applausu, atque etiam Tribunorum assensu exceptus est: Et magnum vulnus dedisset Reipubl. nisi dolum festina aliorum diligentia detexisset, vide *Valer. Max. l. 9. c. 16.* Eâdem fraudulentîâ, sed graviore damno eandem Rempublicam Andriſcus postea circumvenit, qui Philippum Macedoniæ Regem se esse mentiens, cum formam nomenque Regium, animo quoque Regio impleſſet, exercitu collecto Prætorem Romanum profligavit, nec, nisi à Metello Consule vinci potuit, etiam cum victus esset, hoc à fortunâ solatium adeptus, ut de ipso po-

D s      pulus

pulus Romanus, tanquam de vero Rege, triumpharet, ut est apud Florum (*Lib. II, c. 14.*) Sub Vitellio Imperatore, Geta quidam in Illyrico, forte servili natus, Scribonianum se finxit, & coactâ servorum manu Illyricum turbavit, longius sparsurus servilis belli flammam, nisi maturè comprehensus, crucem, ut fugitivus, subiisset, qui Senatorem se dicens, Senatui & Imperatori imperare affectaverat. Similes quoque Planos posteriora tempora in omnibus pene Regnis & Rebus publicis tulêre. Nam & Germanicum Imperium Pseudo-Henricum vidit, de quo Fulgosus (*Lib. XI. 16.*) legi potest: & postea Pseudo-Fridericum, de quo præter Crantzium & alios, Caspar Dornavius in Rudolpho Habsburgico memorat, tantillum abfuisse, quin ab eo, & imperio & vitâ, laudatissimus iste Imperator fuerit privatus. Magna Friderici Imperatoris memoria erat ubique in Germania. Itaque cum se esse finxit quidam Tito Colupius, homo senex, & apprimè astutus. Aderat forma similis, & par ætas. Genus porrò & majores Friderici exactè idem numerare noverat. Jam dicta ejusdem & facta ita graphicè referebat, ut plurimis fidem faceret, ipsisimum esse Fridericum. Inter alios, Thuringiæ quoq; Landgravium in partes suas pertraxit. Eòque demum tùm virium tùm audaciæ pervenit veterator, ut Rudolpho Imperatori apertè sese opponeret. Et indici ei jussit, ut deposito imperio, sibi ut vero Domino suo, obsequium præstaret. Sed non diu histrioniam hanc exer-

exercuit impostor. Detracta homini persona est, defertusq; paulò post à sectatoribus suis, & in manus Imperatoris traditus, ignis supplicio fallaciam suam luit. Ita in Hispania fuère, qui Alphonsos; in Britannia, qui Richardos; alii, qui Eduardos; in Flandriâ, qui Balduinos; in Lusitaniâ, qui Sebastianos se esse mentirentur. In Moscoviâ, quas turbas parentum nostrorum ævo, duo Demetrii dederint, nolo commemorare, quia res in plerorumque memoriâ recens est & à nobis in Floro Polonico exponitur. Sed eorum prior, verus an falsus Moscoviæ Principum sanguis fuerit, nec dum satis compertum habetur. Alter utique certissimus Syco-phanta, cum fastigio prioris succedere vellet, exitio successe. Nam ut ille à Moschis, ita iste à Tartaris, stipatoribus suis, occisus est.

**B**Enigma est materies, Prælustres & Generosissimi Adolescentes, quam hîc tractamus, & diu usque stylum tenere meum posset: si inprimis alteram etiam Nominis Vestri partem simili explicatione evolvere vellem. Ab AURO enim, metallorum nobilissimo & prorsus principe, multa ac fortunæ Summatum longè convenientissima præcepta ducere, in proclivi esset. Sed hîc jam sisto. Et opinor tam erectis ad omnia optima animis ista facile sufficere. Quod restat, DEI perpetuum vobis favorem, & secundissimum Illustris. Domui Vestræ rerum omnium successum animatus voveo ac precor.

FINIS.

*Ad lectorem.*

CUM hæc scriberem, prælustres hi juvenes in musteâ, ego in virili ætate eram. Nunc annis provectus altiora & magis cælestia agito. Illi præcoce fato abrepti, allatum ex Sveciâ in Prusiam decus familiæ, unâ secum in sepulchrum duxêre. Neq; enim nisi Sorores, & ex his natos liberos reliquerunt superstites. Prima natu nupta fuit Illustri JOANNI CASIMIRO KRETCOVIO, & post hujus fata Illustri STANISLAO KONOPATSCIO, Castellani dæ Elbingensi, altera Illustri VLADISLAO LOSZ Dapifero Plocensi. Tertia nupserat illustri N. DROHOJOVIO; sed citò thalamum tumulo mutavit.

---

Quandoquidem chartæ aliquot vacuæ supersunt, lubet hic subungere, POEMA CONSOLATORIUM, Serenissimo olim Regi JOANNI CASIMIRO, cùm post multas ingentes calamitates, in Prusiam Anno 1656. mense Nov. venisset, scriptum, in quo multa de VIRTUTE, & laboribus ærumnisq; MAGNOLUM VIRORUM diximus.

GRA.

GRATULATIO PAREGORICA,

Ad

SERENISS. REGEM

JOANNEM CASIMIRUM

Cum

Anno 1656. ex Silesiâ post multas ingentes  
calamitates & quasi ab exilio, Gedanum  
venisset.

**E**Nthea lux animi, Virtus, natalis Olympi  
Conscia, se digno cum pectore sedit, in altum,  
Corporis eluctata moras, cœlestibus auris  
Surgit, & ad Superos, cognatæ Stirpis an-  
hela,

Nititur, hîc metamque suo, requiemque labori  
Quærit, & ardenti spondet sibi præmia voto.  
Dum tamen in terris habitat, non desinit hospes  
Nobilibus laudem Studiis, & honesta mereri,  
Ingenio dextrâve potens, suffragia famæ.

Hîc leges, hîc sceptrâ locat, frenisque coërcet  
Quantumcunque potest, fontes, & vindice pœnâ  
Crimina persequitur, factisque rependit honestis  
Mercedem, fasces tribuens, meritasque Curules.

Si scelus evaluit nimium, dignisque negavit  
Præmia, Vatinique tenent Clodique secures.

Altius illa suis pretium proponit alumniis,  
Ipsa sibi non vile decus; non frigida merces.

Erigit inprimis supra mortalia mentes.

Et



Et pulchris agit at facibus, redditque futuri  
Prudentes, pariterque æqui rectique tenaces.  
Illa voluptatum stimulos rationis habenâ  
Temperat, illa metus dextrè regit, illa dolores,  
Et ferale odium premit, irarumque tumultus.  
Illa eadem, quicquid Fortuna vel obtulit ultrò,  
Vel labor extorsit, sterili non detinet umbrâ,  
Nec tegit invidiâ. Potiùs sua munera spargit,  
Et multis commune facit, quod possidet ipsa.  
Obligat hæc etenim populos, Orbique quietem  
Servat, & infausto depellens nubila sæclo,  
Noxia propulsât, dira & contagia belli,  
Quà fas est, Patriis, solers avertit ab oris.  
Si vis incubuit, si proruit hostis ad arma,  
Intolerans æquæ pacis, servareque jura  
Nescius, haudquaquam segni Virtutis Alumnus  
Detinet arma sinu. Prodit generosus, & ardens  
Incedit per scuta verûm, per tela, per ignes,  
Fluminaque effuso signat camposque cruore;  
Et vario sparsas cumulat dum vulnere cædes,  
Non timet ipsè mori. Stimulat per densa ruentem  
Agmina libertatis amor, movet ardor honesti,  
Pulchraque perpetuis incendit gloria flammis.  
Talibus ad Trabeas meritis, sellasque Curules  
Tendit, & illustri penetrat Capitolia pompâ,  
Suspenditque tholis palmas, figitque trophæa,  
Pieriisque simul nunquam moritura papyris  
Tradit, & æternis inscribit nomina fastis.  
Sidera cum repetit Virtus, quæ gessit in Orbe,

Supremo

Supremo sistit Domino, partosque triumphos  
Imputat auctori, cujus mox læta favore,  
Æthereum diadema capit, sociataque Magnis  
Cœlitibus, numero nova gaudia concitat aucto.  
Hic VIRTUTIS honos, hæc illi destinat æther  
Præmia. Sed minimè molli tamen ista parantur  
Tramite: difficili veniunt quærenda labore.  
Obvia nimirum sunt vilia: prostat arena  
Omnibus, & tenui molimine saxa leguntur.  
Aurea sed penitis terrarum massa cavernis  
Eruitur: cœco Thetidos latet unio fundo:  
Ambraque non quovis, quovis natat alga pro-  
fundo.

Sic prona est vitii, nullâ via rupe tenetur,  
Sed præceps immane patet. Prœclivis Averni  
Descensus, contrâ superas operosus ad auras  
Transitus est. Celso VIRTUS in culmine sacram  
Defixit sedem, scruposis triste salebris  
Illuc ducit iter, vario scinduntur hiatu  
Confraga, & in facilem pendent prærupta ruinam.  
Scandere cæptantem quatiunt insana Notorum  
Prælia, & infesto certant avertere nisu.  
Ad latus haud unus sinuosa volumina jactat  
Anguis, & hostili Draco pestifer ore susurrat.  
Hæc magno superanda viris sunt cuncta labore,  
Si summi cupiunt confidere vertice montis.  
Scilicet invidiæ dentes fabricæque doliq;  
Insidiatorum, tum quicquid ubique malignum,  
Quicquid & infandis vitiorum sordibus horret,

Id grave Virtutis lumen, vultusque verendos  
 Ferre nequit, jugi contra luctatur arenâ,  
 Et velut oppositis tentat certamina castris.  
 Sæpè sed adversis etiam Dea cæca manipulis  
 Ingruit, & sceleri faulrix male-sana ministrat,  
 Injustisque ferox meliores concurrit armis.  
 Scilicet hos audax, vel in optima pectora, ludos  
 Permittit Fortuna sibi, permittit & ipse  
 Fortunæ RECTOR, totius & Arbiter Orbis.  
 Sic etenim solet ille Viros ostendere magnos.  
 Sic facit is magnos. Nam non-nisi vulnere multo  
 Perveniant ad summa Duces fastigia laudum.  
 Sic victura solent sibi condere nomina Nautæ,  
 Qui trepidâ cursum turbata per æquora navi  
 Felicem tenuère. Salum moveatur ab imo  
 Gurgite, vesani surgant ad sidera fluctus,  
 Non faciat nisi spuma diem, vel ab æthere fulmen,  
 Antennas rapiant venti, media arbor in undâ  
 Cum velis demersa natet. Bibat ipsa fatiscens  
 Æquoreas jam puppis aquas, tum Navita, si quid  
 Artis habet, monstrare ardet, tum sistere tuto  
 Littore si potuit, trepido cum remige, proram :  
 Egregiam sanè laudem famamque meretur.  
 Sic adversa probant pariter Virtutis alumnos  
 Fata, sed ignavo contrà marcescere somno,  
 Et torpere solent Felicibus otia luxu.  
 Ærumnis nutritur honos; sub sorte malignâ  
 Surgit, & illustri splendescit gloria luce.  
 Quid majus terræ? quid habent pretiosius auro?  
Attamen

Attamen haud trutinam lapidis fert iudicis Aurum,  
Id nisi septeno fornax decoxerit igne.  
Reginâ volucrum non est laudatior ulla,  
Non animis quoque major Avis: tamen ægriûs illam  
Ut sobolem, acceptat mater: prius ætheris igne  
Explorat teneram: Phæbi si lumina fortes  
Sustinuere oculi, demùm pro germine verò  
Suscipit alma parens; si connivêre, repellit.  
Non aliâ Numen pariter sua pignora lege  
Excipit, adversis variis, variisque periclis  
Scrutatur duratque animos: & subjicit ungui  
Fortunæ, discant ut tristia ferre, novercæ.  
Sic, quosunque vehit prælustri gloria curru,  
Quos nova, quos præsci celebravit temporis ætas,  
Sic nomen peperêre sibi. Non pagina sacra  
Diversum signavit iter, non carmina vatum.  
Talibus Alciden agitarunt sidera luctis,  
Heroêmque suo formarunt æthere dignum.  
Vix dum natus erat, spiris cum tristibus angvis  
Incubuit puero, tenerosque cruore lacertos  
Imbuit elisus. Juveni prostrata tremendus  
Submisit sua colla Leo, submisit & hydra,  
Et Phlegethonteis protractus Cerberus undis.  
Idem tergemino pollentem corpore vicit  
Geryonem, Taurosque truces jugulavit, & Apros.  
Quicquid & in terris ultricia fulmina cœli  
Commeruisse videbatur, præfortibus ille  
Perdomuit manibus, pondusque recepit Atlantis,  
Desponsumque sibi collo libravit Olympum.

E

Sed

Sed magè certa sequar. Juvenùm castissimus ille  
*Josephus*, sancto soboles carissima patri,  
 Quâ flagrat invidiâ? fratrum quas sustinet iras?  
 Quod datur in barathrum præceps? ut *Memphidos*  
 oras,

Externique jugum Domini male venditus intrat?  
Hinc dein exemptus, quanto discrimine vitæ  
Virgineos servat mores, puroque virentem  
Flore pudicitiam? quas rursus carceris umbras  
Ingreditur, visus graviter peccasse petenti  
Flagitium Dominæ, peccare quod abnuat, insons,  
Et poenæ, sine labe, reus. Tamen adfuit illi  
Numen, & optatâ clausit mala fata coronâ.  
Namque is magnificam tandem productus in Au-  
lam,

Murice Sidonio fordes, ac vincula sceptrō  
Mutat, & immensis regnat ditionibus exul, |  
Niliacæ præses terræ, solique secundus  
Pharonidæ, latèquè aliis nutritius oris,  
Et fratrum, Patrisque sui Regalis alumnus.  
Jam quid *Jeshaden*, vatum Regumque piorum  
Æternum decus, aggrediar? non copia lingvæ  
Tanta datur fandi, nec se tam carmine largum  
Præbet Apollo mihi: varios ut dicere casus,  
Fatalesque queam gyros, durosque labores,  
Quæis *Solymi* quondam conscendit culmina Regni.  
Vix dum puber erat, patrii cum pastor ovilis,  
Quamlibet invalidus membris, tamen auspice fre-

Numine, magnanimos cœpit jugulare leones.  
 His tyrociniis majoribus ille tropheis  
 Prælusit, summas posthac aditurus habenas,  
 Proque pedo vili sceptrum gesturus Hebræum.  
 Quod tenui primum fundâ (mirabile dictu)  
 Promeruit juvenis, vastâ cum mole superbum  
 Stravit, & illustri confecit cœde Gigantem.  
 Cumque caput raptum populoque Ducique su-  
 premo

Inter honoratæ monstravit fercula pompæ,  
 Inclytus hinc totâ, simul & venerabilis aulâ  
 Exitit. At Solymum tanti memoranda trium-  
 phi

Livoris tacito percussit vulnere Regem  
 Gloria, qui tristi mentem malè percitus oestro,  
 Artibus infontem variis agitavit & armis.  
 Proh Superi ! quas ille minas tulit, exul ab Aula!  
 Ut lauru majore tamen, pulcherque cruore  
 Hostili, magnis obnoxia reddere perstat  
 Regna sibi meritis ! Pariter sed Regia crescit  
 Ira, & quantumvis generum sibi legerat æger  
 Invidiâ Princeps, semper tamen æmulus illum  
 Urget, & ad sævam pergit deposcere cœdem.  
 Ille latebroso per inhospita tesqua recessu  
 Occulitur, vitabundus, vitamque tyranno,  
 Demere cum posset, toties largitur, & hosti  
 Abnuvit esse hostis, Sœceroque extrema minanti  
 Mansit amore gener : nec cæca libido  
 Regnandi, magna pestis blandissima mentis,



Movit, ut audendo cuperet præcurrere fatum.  
Posteà cum Regem diro Libitina tulisset  
Funere, jam plenâ populi moderamen habenâ  
Cepit, & egregios veteri VIRTUTE triumphos  
Egit, oliviferâ præcictus tempora fronde  
Terror Idumæis, Solymi prosperrimus auctor  
Imperii, populisque suis utrâque verendus  
Pallade. Sed læto dum rident omnia vultu,  
Et nihil ad voti culmen superesse videtur,  
Dat turbas furibunda novas, Regemque beatum  
Undique, præcipiti quassat fortuna procellâ :  
Cumque peregrini cesissent agmina Martis,  
Internis prægrande focis jam præparat illi  
Fulmen, & ex imis summæ penetralibus aulæ,  
Ipsiusque sui mediis exsuscitat hostem  
Visceribus, magnum dum seditiosa Parentem  
Invadit Soboles. Reverentia prisca facescit,  
Dat victas natura manûs, amor exulat omnis,  
Suspirat projecta fides. Expellitur armis,  
Quem decuit pietate coli, regnoque fugatur,  
Cujus honos ipso felicitis munere vitæ  
Debuerat redimi. Sed scilicet omnis honesti  
Cura procul cedit, cum pectora corripit æstu  
Ambitio malefana suo : neque displicet isti  
Empta vel extremi sceleris mercede Tyrannis.  
Non tamen optatis ea semper ducitur auris,  
Sæpè sed elatis Divina potentia figit  
Spiritibus remoras, & per sua vota ruinam  
Talibus accelerat. Princeps sic Regius ille

Non

Non modò præruptis infelix excidit ausis,  
Cincinnati sed & ipse suis, ceu funibus, hæsit,  
Arboreâque comâ cœlum inter humumque pepen-  
dit.

Hâc Caput alta petens cepit de fronde coronam.  
At Rex iratis nuper qui cesserat astris  
Exul, opesque suas, celsasque reliquerat arces,  
Ad solium Regale redit, pollutaque Nati  
Flagitiis repetit sacri penetralia tecti,  
Infelix in prole pater, neque divite Regno,  
Quod recipit, tantùm gaudens, quàm funere tali  
Infaufti juvenis mœstus, casuque nefando.  
Sed quid prisca loquor, resonant quibus undique  
templa?

Nonne patet propior campus? nonne objicit ipsa  
Stirps tua fortunæ varios, REGUM OPTIME,  
lusus?

Attamen hos etiam mihi non lubet ordine cun-  
ctos

Effari, nam majus opus, plectrumque requirunt  
Dignius. At magnum saltem, CASIMIRE, PA-  
RENTEM

Sufficiat libare tuum. Quibus ille periclis  
Ætatis teneræ primo jactatus ab ungue est?  
Quàm variis quondam virides exercuit annos  
Casibus? Obsèptus squalenti carceris umbrâ  
Sedit uterque Parens, cum prodiit ille sub auras,  
Et nova maternis mutavit vincula vinclis.  
Iugemuit misero veneranda puerpera fato:

*Has ergò è patris, inquit, deducta sub oras  
 Magna Jagellonidum Soboles, per cœrula veni  
 Æquora, libertas nobis ut rapta periret?  
 Libertas hominum cui vis, brutisq; vel ipsis  
 Suave bonum. Sic Augusti pallatia Fratris  
 Deserui, rigidis cinctam ut custodibus arcem  
 Incolerem, Princeps decoriq; mihiq; superstes?  
 Quod crimen, quod triste nefas commisimus un-  
 quam?*

*Quid tener hic meruit nostro de viscere fœtus,  
 Ut subeat commune jugum? neq; libera Solis  
 Lumina conspiciat: captiva sed ubera sugat  
 Matris, & incluso juxtà ferat oscula Patri.  
 Attamen intrepido discrimina nostra feramus  
 Pectore, lux veniet, magno nec limite distat,  
 Quæ nobis injecta, truci mox vincula Regi  
 Injiciet, Regnique dabit moderamina captis.  
 Et tu, parve Puer, maturus avita tenebis  
 Sceptra Jagellonidum, & Lechicis dominaberis  
 oris.*

*Ac Patris in Regnis, hæres quia proximus urges,  
 Tu pariter successor eris: sed mira regenti  
 Instabit fortuna tibi. Sic dixit, & ortæ  
 Defluxêre genis lachrymæ. Neque dicta fefellit  
 Eventus. Tristi Genitor dimissus ab arce  
 Sceptra capit, Fratremque suas, autore Senatu,*

*Cogit*

Cogit adire vices. Crescit quoque *Filius*, ingens  
 Spes utriusque Domûs jucundaque cura Parentum.  
 Mox cum prima genas tegetet lanugo, vocatus  
 Ad Lechi solium, magni post fata *Batori*,  
 Incipit Augustæ populis edicere terræ  
 Jura SIGISMUNDUS, diademate cinctus avito,  
 Atque idem Patrium regimen, labentibus annis,  
 Suscipit, & totâ populi plaudente coronâ,  
 Datque capitque fidem. Sed post contraria votis  
 Ejusdem Fortuna fuit. Dum tristis Enyo  
 Sacra, profana movet. Proceres discordibus ar-  
 mis

Scinduntur, sævitque animis malè turbidus ordo  
 Nobilium. Hæredi tolluntur Regna NEPOTI,  
 Sumit & hæc PATRUUS, propriæque obnoxia  
 stirpi

Reddit, & ingenti prætextu parta tuctur:  
 Trajiciensque sinus pelagi, Livonidi signa  
 Terræ infert, LECHICOQUE movet certamina  
 Sceptro.

Unde tot asfiduis crepuerunt mesibus arma,  
 PRUSSIDOS & latè manarunt sanguine campi.  
 Sed nec Sarmatico semper concordia sceptro  
 Perstitit, hîc pariter populos armavit Erinnyis,  
 Et, magnis Ducibus, turbam violenta *Quiritum*  
 Concivit, Regemque odiis aggressa malignis,  
 Civili cecinit tristissima classica bello.  
 Quid tamen? exortos Fortuna secunda tumultus  
 Destituit, nec fausta diu tulit aura Tribunos,

Autores belli. Superavit, judice cœlo,  
 Regia majestas, irasque animosque feroces  
 Leniit, & sani felici templa quiete  
 Clausit, in externas divertens tristia gentes.  
 Jam numeris si nostra suis Te dicere Musa,  
 REX CASIMIRE, velit, tantis quis terminus orsis?  
 Dicenti quis finis erit? Sed proxima tantum  
 Tangere, consilium est. Clarum super æthera Fra-  
 trem

Cum sua reddiderant Astris non æqua Polono  
 Fata, quis orba ferus turbavit Regna tumultus?  
 Quis furor agrestes lymphavit & arma rebeli  
 Accinxit populo, permiscens omnia vastis  
 Sauromatum terris? Tum Te malèquassa Patro-  
 num

Elegit tua Terra sibi, & diademate vinxit,  
 Tu mala pacasti, sed multo sæpè labore,  
 Casibus & variis traxisti tempora, vitæ  
 Prodigus ipse Tuæ. Nam sæpius hydra malignum  
 Erexit rediviva caput; viresque resumpsit  
 Titanum truculenta manus. Tu sospite dextrâ  
 Vicisti trepidos, ac tandem legibus æquis  
 Mite jugum ravidæ quæsisti imponere plebi.  
 Post & Hyperboreus robur prægrande Dynastes  
 Commovit, fessoque manus injecit atroces  
 Sarmatiæ populo, Lithavosque acerrimus agros  
 Corripuit: cui tota suas propè Russia vires  
 Addidit, & junxit perjurus iniqua Cosacus  
 Arma, sacro fidei jure, & communibus aris

Junctus, Moschiadum trabeas latèque patentes  
Jam dudum veneratus opes. Quò pronius illis  
Mox terræ patuère tuæ : nec sola catervis  
Innumeris potuit lassata Polonia vires  
Objectare pares. Accessit denique Gotthus,  
Trajectoque tuos invasit milite fines  
Tota fremens Arctos, audax Germania robur  
Miscuit, immisitque Duces, validasque phalanges.  
Et Scythicas ducens mox Transylvania turmas  
Ingruit. Has nostri subitò crepitantibus armis  
Deprènsi, langvente parant avertere dextrâ :  
At frustrâ. Validæ nam præpotuère cohortes,  
Et tantis Ducibus, quos Teutona terra tot annis  
Durârat bello, vix ullo obstante, Polonum  
Pervasêre solum. Nam nec concordia mentes  
Vinxerat, occultos irarum pectore fluctus  
Voluebant Procerum multi, turbonibus aures  
Præbentes; & lapsâ novâ feliciùs aurâ  
Impleri sua vela rati. Tu tempore tali  
Quas poteras, contra ducis, Rex optime, turmas.  
Vincere sed primis æther Te noluit ausis ;  
In nostrum quia justa nefas exarserat ira ;  
Terræque intererat, rigidum sentire flagellum,  
Disceret ut sanctis melius sua dedere colla  
Legibus, exueretque situm, moresque solutos.  
Scilicet in præceptis scelerum nimis impete prono  
Ivimus, & metam vitiis non fiximus ullam.  
Improba jam dudum lascivo ardore libido  
Prolicuit Nemesis : simul & vesana gulosi



Luxuries ventris, patriique superbia censûs  
 Prodigæ, & ingenti contemnens omnia cristâ  
 Spiritus, ac miseræ toties injuria plebi  
 Vis, legumque acies obtusa, & languidus æqui  
 Justiciæque vigor, nulloque coërcita fræno,  
 Ipsiisque etiam secunda licentia cœli.  
 Ingemuere pii, simul agmina tanta malorum  
 Præfagis sensere animis. Tuque, optime Regum,  
 Optasti vitiis nostris afferre medelam.  
 Sed citiore nefas, & pœna secuta cucurrit,  
 Quam medicina, gradu. Rapidi sic Martia belli  
 Tempestas crevit, totoque gravissima cœlo  
 Fulmina Parrhasiis tœnuere ruentia flammis.  
 Et propè jam Boreæ cessit, rigidoque Trioni  
 Fissa ratis, tremuitque ingens sub pondere Cla-  
 vus.

Interea valuere preces, & vota severum  
 Æthera mulsêrunt: veniam sibi supplice vultu  
 Sarmatiæ tellus petiit: simul ipsa lacertos  
 Movit, & antiquæ memori se pectore laudis  
 Admonuit. Proceres, subito quos impete primum  
 Dispulerat fortuna celer; præeunte Camillo,  
 Postera perpetuis quem dicet pagina fastis,  
 Consilium capiunt, tali sub fasce gementem  
 Quî servant Patriam. Tu mox quoque jungeris  
 illis,

Et sparsos passim revocas sub signa Quirites,  
 In cunctos pariter casus, & in omne periculum  
 Promittens Regale caput. Primusque juvandi

Rem lapsam modus occurrit, pacare Cosacos,  
 Totiusque Arcti subnixum robore Moschum.  
 Nec male cesit opus. Mox, qui jam restitit unus,  
 Omnibus impetitur nervorum viribus hostis.  
 Ambiguo sed adhuc stabat Rhamnusia vultu,  
 Et velut alterutram metuens damnare ruinæ,  
 Quam vinci vellet, nequii decernere, gentem.  
 Unde diu dubiis hæsit Victoria pennis.  
 At nuper Lechicam, post multa pericula, terram  
 Respexit melior DEus, ingentesque paratus  
 Jam fulcit, Casimire, tuos : jam pluribus hostis  
 Mænibus excutitur, variosque subinde requirit  
 Qui bello cecidere, Duces, captive tenentur.  
 At tua pervolitant totum nunc agmina Regnum,  
 Et repetunt Urbes, aliasque indagine cingunt.  
 Ipse Borusiacos, Aquilis comitantibus, agros  
 Ingressus, quod læta tibi fortuna secundet,  
 Oppida, quæ firmis infederat hætenus hostis  
 Præsidiiis, sub prima vocas tua jura maniplis  
 Vindicibus : lauruque virens, palmisque decorus,  
 Omine felici. nostris Te Mænibus inferis.  
 Gestit ovans & læta facit tibi vota Senatus,  
 Exultat Populus. Dominoque occurrere certans  
 Urbs totos effusa sinûs, & plena triumphi,  
 Talibus affatur Te, Musâ interprete dictis ;  
*Cujus inoffensâ, ceu fas Pietasq; jubeant,*  
*Intrepidâq; fide nutum servavimus, inter*  
*Bellonæ strepitus, nihil arma dolosve morati:*

*Cujus*

*Cujus & infestæ Constantia nostra tot annis  
 Ingemuit sorti, fidisq; obnoxia votis,  
 Quam potuit, celeravit opem; terrâque mari-  
 que,*

*Obnitens valido modicis pro viribus hosti,  
 Magnanimosque Duces, formidatosque per Or-  
 bem,*

*Numinis auspicio, vinclos in carcere monstrans:  
 Hunc latabundi nostrâ veneramur in Urbe,  
 Et saluum Cives patulis amplectimur ulnis.  
 Unde pio primùm grates persolvimus ore  
 Æthereo, qui cuncta gerit fleclitque, Monar-  
 chæ.*

*Ille laboranti per tot discrimina Regno,  
 Et grandi columnen rupesque adamantina Regi,  
 Hos pariter nostros cælesti milite muros,  
 Fessaque consiliis & robore pectora sepsit,  
 Vertit & horribiles valida in munimina montes.  
 Tu verò Lechici Rector fortissime Sceptri,  
 O Salve CASIMIRE, tuæ Lux unica Stirpis,  
 Perpetuumq; decus. Qualis post longa refuget  
 Nubila, cum nitidos pulsâ caligine vultus  
 Ostendit, pulchramq; comam Phœbéia lampas:  
 Talis in obscurâ bellorum nube gementi  
 Appares Populo. Non aequè lumine grato,*

*Cum*

*Cum venti strepuere, & inhorruit unda tenebris,  
Cumq; Erebo cælum Neptunia miscuit ira,  
Affulget miseris gemino cum sidere Nautis  
Tyndarides. O Te seros sic porrò per annos  
Cælica perpetuis clementia protegat alis :  
Te curam probet esse suam, Te nobile cæli  
Delicium, columenq; Tuis inflexile terris.  
Ex Te sit meritum pretium, sit legibus æquis  
Præsidium, duros virtus Tua fulminet hostes.  
Ut sic armis claudantur limina Martis,  
Ut populis fœcunda quies, ut candida sæclo  
Pax redeat, plenoque fluat bona Copia cornu  
Omnibus, huicque ample Tua Gratia fulgeat  
Urbi,  
Fulgeat & Musis, quæ Te super æthera tollent,  
Et tua perpetuis inscribent nomina chartis.*

Hymnus

S. S. AMBROSII & AUGUSTINI  
TE DEUM LAUDAMUS

&c.

*Odâ Latinâ redditus.*

**T**Emagne rerum Conditor omnium,  
Læti decora laudis adoreâ  
Mactamus, & grates merenti  
Solvimus ore tibi perennes.

Quâcunque mundi machina panditur,  
Clarescit ingens gloria nominis  
Tui, celebraturque Eo

Solis, & Hesperio cubili.

Te Sancta Cæli Spirituum cohors,

Te Cherubina & Seraphidum fonans

Vox, *Sanctus es Tu terq; Sanctus,*

Ingeminat, *DEUS Imperator*

*Dextrâ potentum maximus agminum.*

Te plenus æther, mirificum decus,

*Et summa Majestas honoris*

*Splendet ubiq; Tui per Orbem.*

Apostolorum Te sacra dodecas,

Te turba Vatum fatidica, & suo

Cruore pulchri Martyres, &

Christiadum genus omne adorat.

Fontem

Fontem celebrant Te, Pater, omnium,  
 Natumque Patri Numine comparem,  
 Et Spiritum manantem utroque,  
 Muneris omnimodi datorem.

Te, Nate, nobis immemorabili  
 Ortu, Paternæ mentis imaginem,  
 Mortalium causâ fatemur  
 Virgineum subiisse ventrem.

Te morte mortis spicula, te stygis  
 Fregisse claustrum, regnaque tristia,  
 Et perditæ felicitati

Restituisse perire dignos.

Hinc te triumpho sidera nobili  
 Intrasse; & orbis flectere cardines  
 Cælique ab aulâ tandem, habendo  
 Judicio reducem futurum:

Succurre nobis optime Cælitum  
 Idemque terræ totius Arbiter,  
 Succurre nobis, quos cruoris  
 Grande tui pretium redemit.

Fac Christe, Cæli participes tui  
 Ut simus olim, fac fidei viâ

Quos æmulari optamus, illis  
 In Superâ sociemur Aulâ.


Te pande nobis, pande DEus, Tuo  
 Optata præbe fata peculio,

Dextrâ fideles duc potente,  
 Auspiciisque bea secundis.



Phæbéa nunquam fax revehit diem,  
 Quin nostra laudi lingua vacet tuæ,  
     Nec grande nomen tradere ævo  
     Immemores erimus futuro.  
 O fausta nobis hæc niteat dies,  
 Nec noxiarum nos maculet notis,  
     Cumque in nefas proni ruamus,  
     Sustineas, Pater, impotentes.  
 O experiri da placidus tuam  
 Nos lenitatem, viscera gratiæ  
     Effunde, & alluce serenam  
     Supplicibus faciem ministris.  
 Hæc nempe nostri pectoris intimis  
 Sedit favoris spes penetralibus :  
     In te recumbentes, ruboris  
     Perpetuò maculâ carebunt.







Biblioteka Jagiellońska



stdr0013623



